

Maupay gud an sitwasyon agud dugang nga ipasulong an demokratiko nga rebolusyon han katawhan

Komite Sentral
Partido Komunista ng Pilipinas

Hul-os nga kalipay naton nga igselebrar an ika-57 nga anibersaryo han dakila nga Partido Komunista ng Pilipinas! Hini nga makasaysayan nga okasyon, iginpapaabot han Komite Sentral an mapaso hini nga pagbati ha ngatanan nga kadre ngan kaapi han Partido, ha mga kaapi han mga kaalyado nga rebolusyunaryo nga organisasyon han National Democratic Front, ha mga sangkay, ha mga igkasi komunista, pwersa nga rebolusyunaryo ngan kontra-imperyalista ha magkalain-lain nga parte han kalibutan, ngan ha bug-os nga katawhan Pilipino.

Hini nga adlaw hinumduman naton ngan kilal-on an ngatanan nga bayani ngan martir han rebolusyon nga Pilipino. Tumindog kita pa-

ra taas-kamao nga maghatag pag-saludar ha hinumduman ni Kasamang Jose Maria Sison, tagapangulo nga tagapagtukod han Komite

Sentral han Partido, nga nagserbe nga giya ngan lamrag ha Partido ngan pira nga henerasyon han mga komunista ngan rebolusyunaryo nga aktibista. Saludaran liwat naton an hinumduman han ngatanan nga bayani ngan martir han katawhan Pilipino, kaupod an pinakahinigugma nga mga lider nga nagserbe ha Komite Sentral, mga Pula nga mangaraway han Bagong Hukbong Bayan, ngan ngatanan nga mga kadre ngan kaapi nga hukas ha kasingkasing nga



iginhalad an ira bug-os nga kinabuhi para ha interes han katalwasan han ngatanan nga tinalumpigos.

Saludaran naton hira Kasamang Luis Jalandoni, hadto anay pinuno han internasyunal nga tinaglawas han NDFP ngan pinuno han NDFP *panel* ha erestorya pan-kamurayawan, nga namatay hadton Hunyo ha The Netherlands; ngan hi Kasamang Maria Malaya (Myrna Sularte), nga ginpatay han kaaway ha usa nga agway ha kabukiran han Butuan City hadton Pebrero. Igpaabot liwat naton an pagsaludarkan Kasamang Basavaraju, hadto anay pankabug-usan nga sekretaryo han Komite Sentral han Communist Party of India (Maoist) ngan hi Kasamang Madvi Hidma, kumander han People's Liberation Guerilla Army ha India, ngan ha ngatanan nga iba pa nga rebolusyunaryo ha magkalain-lain nga parte han kalibutan nga naghalad han ira kinabuhi para ha internasyunal nga proletaryado. Kumuha kita han inspirasyon ha ira magranggat nga kinabuhi.

Kilal-on liwat naton hini nga adlaw an ngatanan nga bag-o nga kaapi han Partido, labina an mga kabatan-unan nga kadre tikang ha ranggo han masa nga anakbalhas, mga intelektwal ngan iba pa nga klase ha katilingban. Kamo an kabubwason han Partido ngan rebolusyon Pilipino. Maduroto kamo nga mag-aram, kumuha hin giya, patarumon an hunahuna ngan magin mapainubsanon ha pag-atubang ha mga ayat ha pamumuno ha magkalain-lain nga natad han rebolusyunaryo nga buruhaton han Partido. Kabakyang niyo ha pagsugbong han magbug-at nga responsabilidad an

mga edaran ngan mayda eksperyensya nga mga kadre ngan kaapi han Partido nga andam magsagdon ngan magpasaro han ira eksperyensya.

Igbandera naton hini nga adlaw an Marxismo-Leninismo-Maoismo, an madig-on nga teoritikal nga pundasyon kun diin nakatindog an Partido. Ini an unibersal nga teorya para ha pagtatalwas han klase nga trabahador ngan ngatanan nga tinalumpigos nga klase. Padig-unon naton an mga batakan nga prinsipyo han Partido ngan an programa hini para ha demokratiko nga rebolusyon han katawhan pinaagi han panmaihaan nga gerra han katawhan agud tapuson an matalumpiguson nga sistema nga bagakolonyal ngan bagapyudal, ibagsak an tulo nga batakan nga problema han imperyalismo, pyudalismo ngan burukrata kapitalismo, ngan kab-uton an demokrasya ngan nasyunal nga katalwasan agud himuon an kundisyon para ha sosyalista nga kabubwason.

Nasulod kita yana ha ikatulo katuig han aton kagiusan pagtutulid, nga ha prinsipal usa nga Marxist-Leninista-Maoista nga kagiusan pag-aram. Ha diwa han kagiusan pagtutulid, utro naton nga gin-aadman an aton mga ekspersyensya ngan masinusnanon-ha-kalugaringon nga gintutudlok an aton mga kaluyahan ngan mga nagin pagsasayop. Igin-kakalipay han Komite Sentral nga igreport nga padayon nga nagbubunga an aton kagiusan pagtutulid ngan nagkab-ot han mahinungdanon nga pag-abante ha ideolohiya, pulitika ngan organisasyon. Natapod kita nga ha padayon nga pagpupursige han ngatanan nga kadre ngan kaapi han Partido, ha pamumuno han Komite Sentral, makakab-ot naton an mas dagko nga kadaugan ha mga maabot nga tuig.

Ha lamrag han Marxismo-Leninismo-Maoismo, matarum naton nga analisaron an prinsipal nga mga kontradiksyon nga nakomponer ha presente nga ginkakaatubang nga sitwasyon han nasud ngan bug-os nga kalibutan. Santupon naton an pirmihan nga krisis han bagakolonyal ngan bagapyudal nga sistema ha Pilipinas, ngan an nag-iiha na nga istagnasyon (pagbiaw) han pankali-

butan nga sistema nga kapitalista. Nag-aabre ini han damo ngan dagko nga oportunidad agud ipasulong an tinguha han klase nga trabahador ngan ngatanan nga tinalumpigos ngan tiniyupi nga klase para ha katalwasan.

Ha pagtikang han presente nga tuig ginlauman naton an paglarab han krisis han naghahadi nga sistema ha ilarum han rehimen US-Marcos. Kundi nalabawan gud ini han dagmit nga pagkahinog ngan pagbuto han sitwasyon tikang ha kabutngaon han tuig. Pangilal-an ini, diri la han kahilarumon han pan-ekonomiya ngan pankalitingban nga krisis, kundi labina ngan labaw pa, han nagsasalwak nga kangalas han katawhan Pilipino ha pananalumpigos ngan pagpapakuri ha ira han magtiyupion ngan mapandambong nga naghahadi nga klase.

Piho nga magpapadayon pa ha tiarabot an waray kasolbaran nga krisis atubangan han diri masukol nga korapsyon, pagsabrag han pasista nga terorismo ngan lunod-patay nga pagpakaniyutiyo han rehimen Marcos. An rehimen Marcos yana an pinakakonsentrado nga porma han pananalumpigos ngan pagpapakuri ha katawhan Pilipino. Ha maabot nga tuig, piho nga madako ngan mahiluag pa an kagiusan protesta nga nagrabunos ha naglabay nga mga bulan agud papagbatunon ngan patalsikon hira Marcos ngan Duterte nga amo an nagtaglawas yana ha pinakareaksyunaryo nga barkadahan han mga naghahadi nga klase. Kadungan hini, piho nga mabuto liwat an hiluagan nga mga pag-ato ha kabaryuhan atubangan han waray wantas nga panlulupot han tuna ngan pandambong han karikuhan han nasud.

Paborable kaupay an sitwasyon yana ha Pilipinas agud pamunuan han Partido an dugang nga pag-abante han demokratiko nga rebolusyon han katawhan pinaagi han panmaihaan nga gerra han katawhan. Hakbuton naton ini nga higayon agud labaw nga pahiluagon ngan pakusgon an Partido ngan bug-os nga rebolusyonaryo nga kagiusan, ngan tan-awon an dagko nga pag-abante ha tidaraon.



Ispesyal nga Isyu | Disyembre 26, 2025

 ang.bayan@cpp.ph

An Ang Bayan igin-gagawas duha kabeses kada bulan han Komite Sentral han Partido Komunista ng Pilipinas

I. Natikapintas nga mga sumpakiay atubangan han diri masolbar nga krisis han pankalibutan nga sistema nga kapitalista

Ginbabay-og an bug-os nga kalibutan han upat nga prinsipal nga kontra-diksiyon: giutan han monopolyo burgesya ngan klase nga trabahador, giutan han imperyalismo ngan tinalumpigos nga katawhan ha bug-os nga kalibutan, giutan han mga imperyalista nga poder ngan mga nasud nga naninindugan para ha nasyunal nga katalwasan, ngan giutan han mga nagriribalay nga imperyalista nga nasud. Ha presente, an natikagrabang mga sumpakiay ha pulitika, pinansya, ekonomiya, negosyuhay, ngan militar giutan han pinakadako nga imperyalista nga nasud an prinsipal nga kontradiksiyon, labina atubangan han waray hunong nga pag-iimponer han imperyalista nga US han iya hegemoniya ha bug-os nga kalibutan. Ini an prinsipal nga kontradiksiyon nga naghuhurma han presente nga sitwasyon ha bug-os nga kalibutan.

Naglalarab ha magkalain-lain nga parte han kalibutan an mga armado nga sumpakiay, prinsipal durot han panunulsol han imperyalismo nga US. Mahugot ini nga nakasumpay ha nag-iha na nga istagnasyon han ekonomiya prinsipal han mga kapitalista nga nasud nga diri gud masolbar han monopolyo burgesya. Resulta ini han nagpapadasyon nga krisis han sobra nga produksyon ha haros ngatanan nga industriya, ngan natikadako nga imbentaryo han diri mabaligya nga epektos. Sobra-sobra an produktibo nga kapasidad, labina gud han mga prinsipal nga industriyalisado nga nasud. Durot ini han paglinanat han magkakaribal nga kompaniya nga perdihon an kada tagsa ha produksyon han pinakadamo nga epektos.

Mayda sobra nga produksyon ha haros ngatanan nga industriya tungod ha padayon nga pagpapauswag han mga pwersa ha produksyon, partikular na an mga pagabante ha teknolohiya (kalakip an paggamit han *artificial intelligence* o AI). Mayda sobra-sobra nga kapasidad ha produksyon han mga elektroniko nga higamit, semikonduktor, mga baterya, sarakyan nga elektrik ngan de-gasolina, mga *solar panel*, asero (puthaw), lana ngan petrolyo, kemikal, barko, komersyal nga transportasyon, edro, ngan damo nga iba pa. Mayda liwat sobra-sobra nga produksyon ha haros ngatanan nga produkto nga pan-agrikultura (bugas, mais, soya, trigo ngan iba pa), labina ha mga kapitalista nga nasud.

Ginruruba o ginmalmagastar an

mga pwersa ha produksyon. Tungod ha sobra nga produksyon, damo nga mga industriya an ginpapadalagan han mas himubo tanding ha kapasidad ha produksyon. Ha US, pananglitan, 60%-70% la han kapasidad hini ha produksyon han mga sarakyan an nagagamit. Ha Germany, aada la ha 70% han kapasidad ha kabugusan nga produksyon an nagagamit, hinungdan nga diri nagagamit an bilyun-bilyon kadolyar nga mga higamit ha produksyon. Ha China, mayda kapasidad an mga pabrika dinhi nga magprodyus han tubtub 45 kamilyon nga sarakyan nga elektrik (*e-vehicle*), kundi diri ini hul-os nga nagagamit tungod kay an nababaligya ha pankalibutan nga merkado aada la ha 16-18 kamilyon. Tikadamo an mga kompaniya nga nalulugi o ginlalamon atubangan han grabe nga kapitalista nga kumpetisyon.

Madagmit yana nga nadako an bura (*bubble*, o maupay nga sitwasyon nga diri mag-iha) han AI nga ginkakalisangan han dagko nga monopolyo burgesya. Pira katrilyon nga dolyar an igbubuhos ha natad han AI ha mga masunod nga tuig, ha waray pa katupong nga kadako han pamumuhunan ha imprastraktura ngan bono, lahos ura-ura ha ginlalauman nga *demand* ngan kikitaaon hini. Igintatanding ini yana ha bura han “dotcom” hadton dekada 1990 nga ha dayuday binuto ngan nagresulta ha usa nga krisis ha pinansya.

Mas natikagrabang problema han tinagdamo nga pagtanggap han mga trabahador, pag-iban ha adlaw han trabaho o pagserra han mga pabrika. Ha US, haros 560,000 nga

kompaniya an nalugi ha usa katuig tikang Septyembre 2024, masobra 10% nga pagdamo tanding ha naglabay nga tuig, pinakahitaas tikang 2010; kalakip an 32 nga mayda sobra ha \$1 kabilyon nga balor, nga nagserra ha 12 kabulan tikang Septyembre 2024. Ha nakalabay nga napulo katuig, diri mamenos ha 100,000 nga kapitalista nga umhangan ha US an nagserra dara han padayon nga pagbagsak ha presyo han ira epektos. Ha Germany, ginlalauman nga maabot ha kabugusan nga 22,000 an magseserra nga kompaniya ha bug-os nga tuig (60 kada adlaw), pinakahitaas ha usa kadekada. Ha UK, masobra 2,000 nga kompaniya an nagseserra kada bulan yana nga tuig, samtang aada ha 50,000 nga empresa an aada ha kritikal nga sitwasyon. Ha China, ginlalauman nga 16 nga kompaniya na la (tikang ha 129 nga kompaniya) an masasalin nga nakatindog ha industriya han *e-vehicle* ha masunod nga lima katuig.

Padayon nga natikagrabang disempleyo ha bug-os nga kalibutan. Ha sektor han teknolohiya, gintatantiya nga maabot ha masobra 200,000 an matatanggal nga trabahador tubtub ha katapusan han tuig (70% hini ha US), kalakip an 24,000 ha Intel, 14,000 ha Amazon, 13,000 ha Verizon ngan 9,000 ha Microsoft. Ha industriya han sarakyan ha US, maabot ha 15,000 (20% nga mas hitaas tanding ha nakalabay nga tuig) an igin-anunsyo nga matatanggal yana nga tuig. Gintatantiya nga tubtub 60,000 nga trabahador ha sektor han sarakyan nga elektrik ha China an gintanggal ha trabaho tikang 2024. Masobra 48,000 nga empleyado naman han United Parcel Service an gintanggal ha trabaho tungod ha pagbagsak han deliberi.

Nahiludlod an pankalibutan nga ekonomiya ha istagnasyon tubtub malangan nga pagtubo. Naatubang ha natikadako nga hulga han resesyon an mga ekonomiya han ngatanan nga sentro han kapitalismo. Ini nga huyob han mahinay nga pagtu-

bo han mga ekonomiya magduduha kadekada na, tikang han binuto an krisis pampinansya hadton 2008. Nakarebanse (bawi) an pankalibutan nga ekonomiya hadton 2022 ka-human bumagsak hadton pandemya nga 2020-2021. Yana nga tuig, mayda mga pagtantiya, kalakip an ha World Bank ngan IMF, nga diri matubo an pankalibutan nga ekonomiya hin lahos ha 2.3%, mas himubo tanding ha mas himubo liwat nga 2.5% pagtubo hadton 2024, atubangan han hiluagan nga pagserra han mga pabrika, pagtanggap ha mga trabahador ngan himubo nga *demand* tungod ha hitaas nga tantos han implasyon, labina ha mga pankonsumo nga epektos.

Nagpapabilin nga aada ha tangpi han resesyon an ekonomiya han US nga gintatantiya nga matubo la han 1.7%-2% yana nga tuig. Haros katunga (o 22) han mga estado ha US an aada na ha resesyon. Ilarum han palisiya nga "America First" han gubyerno nga Trump, iginpatuman an mga desperado nga pitad nga kunuhay para utro nga buhion an ekonomiya ngan industriya. Kalakip dinhi an paghitaas han taripa ha haros ngatanan nga igin-iimport nga epektos han US nga mayda deklarado nga katuyuanan nga proteksyunan ngan suportahan an lokal nga industriya ngan manupaktura. Sugadman, ha naglabay nga 11 kabulan, nagpapabilin nga hunong o nagluya pa an industriyal nga produksyon, kalakip an puthaw ngan mga sarakyan, atubangan han sobra nga pankalibutan nga produksyon ngan sobra nga imbentaryo.

Ginlalauman naman nga matubo la hin 1.3% an ekonomiya han mga nasud ha European Union, kalakip an bagsak nga ekonomiya han Germany nga ginlalauman nga maabot la ha 0.2% (tikang -0.3% hadton 2024). Aada naman ha tangpi han resesyon an United Kingdom tikang pa naglabay nga tuig. Binagsak ha -2.3% an Japan hadton ikatulo nga kwarter han tuig, ngan diri ginlalauman nga matubo hin lahos ha 1% ha bug-os nga tuig. Padayon naman nga nahinay an pagdako han ekonomiya han China nga ginlalauman nga maabot nala ha 5% (tikang masobra 10% nga paghiluag hadton

2000-2010), atubangan han pagkalugi han mga diri nahigagamitan nga *real estate* nga proyekto (kalakip an sobra-sobra nga kondominyum ngan bilding nga pan-upisina), natirok nga ura-ura kadamo nga diri mabaydan nga lokal nga utang ngan pagbagsak han pamumuhunan ha manupaktura ngan imprastraktura.

Ha kabug-usan, gintatantiya nga mayda 40-60 nga nasud an aada yana ha tangpi han resesyon. Labot ha mga prinsipal nga sentro han kapitalismo, kalakip liwat dinhi an pira nga abante nga ekonomiya ha Europe sugad han Austria, Germany, Italy, France ngan Switzerland nga ngatanan negatibo o zero an tantos han pagtubo han ekonomiya, dugang pa ha pira kanapulo nga mga atrasado nga nasud.

An grabe nga krisis han sistema nga kapitalista dugang nga napaggrabe han pagkahibang han kalibutan ngan krisis ha klima. Butaray nga nadiri an dagko nga kapitalista nga nasud nga magpapugong ha pag-angkon han natural nga karikuhan ngan mga hilaw nga materyales, nga hinungdan han natikagrabeng industriyal nga polusyon ngan paghitaas han temperatura ha bugos nga kalibutan. Waray pulos an tinuig nga pakita-ha-tawo nga "climate change conference" nga ginpangunahan han UN, kalakip an iginlansar han hadi ha Brazil.

Ha butnga han krisis han pankalibutan nga sistema nga kapitalista, mas naluludlod an diri industriyalisado, agraryo ngan atrasado nga ekonomiya han mga nasud nga kolonyal, bagakolonyal ngan bagapyudal. Ini nga mga nasud ginpiang han pira kadekada nga mga neoliberal nga palisiya nga nag-abre dinhi ha pagtatambak han langyaw nga sobra nga epektos ngan pandambong han langyaw nga kapitalista nga pamumuhunan. Tungod ha diri magkatupong nga balyuay, nahiaagum ini han pirmihan nga depisito ha negosyuhay, krisis ha pinansya ngan pagsarig ha utang. Samtang natikapintas an kompetisyon han mga monopolyo burgesya para magin surok han pinakabarato nga mga hilaw nga materyales, dugang nga gin-aaragawan ini nga mga nasud han mga imperyalista nga po-

der. Nag-aantos an pira kabilyon nga katawhan hini nga mga nasud atubangan han hiluagan nga disempleyo, himubo nga suhol, panlulupot han tuna ngan pakabuhian, ngan iba pa nga porma han pagpakuri ngan pananalumpigos.

Padayon nga napaling ha pangungutang an mga nasud ha pagatentar nga lapayan an krisis ha ira mga ekonomiya, suportahan an mga subsidyo han estado para ha mga nalulugi nga kompaniya, pondohan an mga imprastraktura ngan tika-dako nga gastos ha depensa. Ha sakob la han syahan nga unom kabulan han 2025, hinitaas hin \$21 katrilyon an pankalibutan nga utang ngan haros \$340 katrilyon ha kabutnga an tuig. Ginrerepresentar han pankalibutan nga utang an haros 290% han kabug-usan nga pankalibutan nga produksyon, nga haros katupong han pinakahitaas nga naabot hadton 2023. Mayoriya han pankalibutan nga utang katin han US, Japan, China ngan pira nga mayor nga nasud ha Europe. Ikatulo nga parte hini utang han US. An pampubliko nga utang ginlalauman nga madako tikang \$102 katrilyon hadton katapusan han 2024 ngadto \$115 katrilyon ha katapusan han tuig. Naabot ha \$31 katrilyon an pampubliko nga utang han mga atrasado nga nasud, doble nga pagdako ha nakalabay nga 15 katuig. Diri mamenos ha 35 nga nasud an namemeligro nga diri makabayad han ira mga utang.

Ginsusunghan han natikagrabeng pankalibutan nga krisis han kapitalismo an mapintas nga isan-isamay han mga imperyalista ngan mga sumpakiay ha kalibutan. Igin-imponer ni Trump an dugang nga mga taripa ha haros ngatanan nga nasud agud makakuha han mga konsesyon ha negosyuhay (kalakip an pagpapasulod han mas damo nga produkto tikang ha US, ngan pangontrata ha pagbaligya han mga sarplas nga higamit militar). Hini nga iya ginhimo, mas ginpapintas niya an kompetisyon ha ekonomiya ngan negosyuhay han mga imperyalista ngan ginpahilarum an kontra-US nga mga sentimyento ha bug-os nga kalibutan.

Natikadako an hulga han paglarab han mga mayor nga armado nga

sumpakiy ha magkalain-lain nga parte han kalibutan, kadungan han natikadako nga pondo nga iginbuhos han mga imperyalista ha militar ngan depensa. Naghitaas ini hin 9.4% hadton 2024 ngadto \$2.72 katrilyon, pinakahitaas nga umento ha naglabay nga tulo kadekada. Padayon ini nga paghitaas yana nga 2025. Maabot ha \$1 katrilyon an panmilitar nga gastos han US yana nga tuig. Ha balayan han bag-o nga National Security Strategy (2025) han US (nga nakapokus prinsipal ha China ngan Russia), igindeklara hini an katuyuanan nga pauswagon an "pinakapoderoso, pinakamapintas, ngan pinakaabante ha teknolohiya" nga pwersa militar.

Igindudon han US nga kinahanglan hini labawan han mas dako nga pwersa an China ha kadagatan ngan "first island chain" ha palibot han nasud. Katuyuanan kuno hini an "likyan an komprontasyon," kundi mas ginpadako la hini an posibilidad nga matikangan an armado nga sumpakiy ngan gerra. Ha kalugaringon nga parte han kalibutan, iginkakasa yana han US an plano nga atakihon an Venezuela (ha South America) ha tahub han "pag-ato ha drug cartel" agud pabagsakon an kontra-imperyalista nga gubyrno ni Maduro, ngan tukuron an usa nga niyutiyo nga gubyrno. Kahuman han nag-iiha nga gerra ha Ukraine nga ginsulsulan han US ngan NATO, iginduduso yana han US an usa nga kasarabutan agud magbahinay ha rekursong katunaan han nasud. Ha Middle East, dirudiretso nga kabakyang han US an Zionista nga estado han Israel ha gerra nga henosidyo kontra ha Palestine nga nagpatay ha diri mamenos ha 67,000 nga Palestino ha duha katuig nga panmomba ha Gaza tikang Oktubre 2023. Ha luyo han "ukoy-bubto" nga ginpasilitar han US hadton Oktubre, padayon an pangatake han mga pwersa nga Zionista nga nagresulta ha pagpatay ha diri mamenos ha 400 na nga Palestino. Iginduduso han US an plano han Israel nga luputon an bug-os nga katunaan. Ginbubligan han US ngan Israel nga bombahon an Iran, nga nagdepensa han nasud pinaagi han mga kontra-atake.

Padayon an pagpapakusog han "komprehensibo nga estratehiko nga bubligay" han Russia ngan China ha porma han ginpakusog nga negosyuhay (labina ha lana ngan enerhiya) ngan panlimitar nga kooperasyon. Padayon nga ginpahiluag an alyansa nga BRICS (Brazil, Russia, India, China ngan South Africa) nga yana mayda napulo na nga membro nga nasud kahuman an pag-api yana nga tuig han Indonesia (kasunod an Egypt, Ethiopia, Iran, United Arab Emirates).

Ha duso hini, ngan komo bulos ha mga taripa ni Trump, padayon an panalinguha han damo nga nasud nga humirayo ha paggamit han dolyar ha mga pampinansya nga transaksyon, bisan kun nagpapabilin ini nga dominante. Kalakip dinhi an pagbaligya han lana han Saudi Arabia ngan iba pa nga nasud ha Middle East (labina ha China), negosyuhay nga yuan-ruble han China ngan Russia, ngan negosyuhay gamit an lokal nga kwarta ha ASEAN. Tikang ha haros waray antes an 2022, maabot na yana ha 20% han kabug-usan nga negosyuhay ha kalibutan an diri nagamit han dolyar, hinungdan han huyob han paghimubo han balor hini, ngan pagkusog han baligyaan han bulawan. Nagtikang hadton 2022-2024 an masobra 1,000 katonelada nga baligyaan, tikang ha abereyds nga tinuig nga baligyaan nga 450-500 katonelada hadton 2010-2021.

An nagpapadayon nga krisis ha mga kapitalista nga nasud nagreresulta han natikapintas nga sumpakiy han mga klase. Padayon nga natikapintas an mga pakigbisog han mga trabahador ha mga sentro nga kapitalista, kalakip an mga welga han mga trabahador han Amazon ha US ngan magkalain-lain nga nasud. Naglarab liwat hini nga kabutnga-an han tuig an hiluagan nga mga welga han mga trabahador ha China para ha umento ha suhol, partikular an kompaniya nga BYD (naghihimo han sarakyan nga elektrik). Naglarab naman an hiluagan nga mga welga ngan gios protesta han mga trabahador ha mga duongan ha Japan hadton Marso tubtub Mayo. Ha Europe, naglarab hadton Disyembre an mga pankabug-usan o dudru-

ngan nga welga han mga trabahador ngan katawhan ha Belgium, the Netherlands, Portugal, Italy ngan France, kontra ha mga palisiya nga *austerity* o pagtitipid, nga prinsipal nga maigo ha pensyon, suhol ngan mga serbisyo pankatilingban. Naglarab liwat an mga mayor nga welga ha mga naglabay nga bulan ha Germany, Spain, United Kingdom ngan iba pa nga nasud.

Reaksyon ha natikakusog nga pag-ato han mga trabahador ngan katawhan an linandaw nga pagpaling han mga estado ha butaray nga pasista nga mga palisiya. Ha US, natikagrabe pa an otoritarianismo ni Donald Trump ha butaray nga pagtalapas ha mga balaud ngan ligal nga proseso ha ginhihimo nga madarahug nga *crackdown* kontra ha mga migrante ha US, nga nakomponer han dako nga bulto han klase nga trabahador. Ha sulsol han monopolyo burgesya, natikakusog an mga partido ngan kagiusan nga pasista ngan konserbatibo, ngan mayda mga naeeleher ha gubyrno. Padayon nga natikagrabe an pangatake kontra ha mga Muslim ngan Arabo (pinakagrabe ha US ha naglabay nga tulo kadekada, kadungan an pagpuyopoy han gubyrno nga Trump ha mga protesta nga maka-Palestine), mga Black ngan Latino ha US, mga LGBT, ngan mga migrante ha Europe. Kaparte han natikakusog nga pasista nga huyob, iginpapatuman an mga balaud ngan palisiya nga hiluagan nga napuyopoy ha mga sibil nga katungod, sugad han pagpapakusog han *mass surveillance*, paggamit han mga *drone*, AI ngan iba pa nga teknolohiya nga natalapas ha mga katungod ha pribasiya. Kahuman an masobra tulo katuig, waray wantas pa gihapon an henosidyo nga gerra han Zionista nga Israel ha Gaza. Ha duso prinsipal han US, ginpapaluya an United Nations pinaagi han paghihikaw dinhi han pondo, labina ha mga ahensya hini para ha tawhanon nga katungod.

An natikakusog nga pasisasyon o pasista nga huyob han mga estado ha US ngan iba pa nga nasud nagduduso ha mga katawhan nga pakusgon an mga kontra-pasista nga pakigbisog ha magkalain-lain nga dapit han kalibutan. Ginlansar an

mayor nga mga rali ngan protesta nga kontrapasista, kalakip an 7 kamilyon katawo nga rali ha masobra 2,700 nga katitirok ha US kontra ha pagpopostura nga hadi ni Trump. Ha Europe, iginlansar an dagko nga kontra-pasista nga rali ha Netherlands, France, Germany, UK, Norway, ngan iba pa nga mga nasud. Nagpapadayon an hiluagan nga mga demonstrasyon han milyun-milyon nga katawhan ha magkalain-lain nga parte han kalibutan kontra ha nagpapadayon nga henosidyo han US ngan Zionista nga estado ha Gaza.

Naglalarab liwat an mga panmasa nga pakigbisog ha mga atrasado nga nasud, atubangan han naghihitaas nga presyo han mga papliton, himubo nga suhol, pagbagsak han suklanan han panginabuhì, panlulupot han tuna ngan pakabuhian, korapsyon ngan garboso nga panginabuhì han mga upisyal han gubyrno, pabug-at nga mga buhis, pagmalgastar han mga pondo han gubyrno ha mga parayaw nga proyekto, pagkadunot han mga serbisyo pankatilingban, ngan tikagrabè nga diri pagkapantay-pantay; ngan mga protesta kontra ha korapsyon ha Kenya, Nepal, Indonezia, Morocco, Madagascar, Peru, Pilipinas ngan iba pa nga mga nasud. Damo hini gintawag nga mga "protesta nga Gen-Z" tungod ha hiluag

nga ispontanyo nga paggios han mga kabatan-unan nga nag-aantos ha butnga han hilarum nga krisis sosyo-ekonomiko. Mayda pira ha ira nga gin-gamit han mga reaksyunaryo o repormista nga partido, kundi damo liwat an ha dayuday nakonso-lida komo mga progresibo ngan rebolusyunaryo.

Maupay gud an kondisyon ha kalibutan para magpakusog an mga proletaryo nga rebolusyunaryo ha magkalain-lain nga parte han kalibutan, ngan tukuron an mga partido komunista, agud magserbe nga lamrag ha masa nga trabahador ngan iba pa nga tinalumpigos ngan tiniyupi nga klase. Ha magkalain-lain nga nasud, nagpapakusog an mga proletaryo nga rebolusyunaryo nga grupo ngan partido ha ideolohiya, ha utro nga pag-aram ngan pagpapahilarum han kasantupan ha Marxismo-Leninismo-Maoismo, ngan paghahaum hini ha ginkakaatubang nira nga kongkreto nga kamutangan. Espiho hini nga panalinguha an nahilansar nga lima na nga teoretikal nga kumperensya han NDFP tikang la Oktubre 2023, nga gintambungan han damo nga partido komunista ngan iba pa nga rebolusyunaryo nga organisasyon agud talakayon an magkalain-lain nga importante nga karukayaknon nga ginkakaatubang han proletaryo ha bug-os nga kalibutan.

Ha mga nasud nga nakatindog an mga partido komunista, aada ha rubas ngan unahan an proletaryo ha magkalain-lain nga porma han mga demokratiko nga panmasa nga pakigbisog, pagbubug-os han hilapad nga nagkakaurusa nga prente para ha pagdependa ha interes ngan kaupayan han hiluag nga masa kontra ha mga neoliberal nga palisiya han imperyalista, pakuri nga programa, korapsyon ngan pasismo han reaksyunaryo nga estado. Ha India, Turkey, Peru, Colombia, Pilipinas ngan iba pa nga nasud, padayon nga nagpupursige an mga partido komunista ha pag-ato ha terorista nga todo-gerra nga panmuypoy, ngan pamumuno ha rebolusyunaryo nga armado nga pakig-away.

Hinog kaupay an sitwasyon para ha pagturok ngan pagrabong han mga partido komunista ngan para ha pagpapapintas han mga rebolusyunaryo nga pakigbisog ha bug-os nga kalibutan. An kundisyon han krisis nga ginhimo han kapitalista nga sistema matambok nga tuna para ha pagsamwak han mga rebolusyunaryo nga ideya ngan hiluagan nga paggios han masa. Sentral an papel han mga partido komunista ha pamumuno han klase nga trabahador ngan iba pa nga tinalumpigos nga klase, ha pakigbisog para ha katalwasan, demokrasya ngan sosyalismo.

II. Naticagrabe nga krisis ha ekonomiya ngan pulitika ilarum han rehimen US-Marcos

Dugang nga naluludlod ha krisis an naghahadi nga sistema nga bagakolonyal ngan bagapyudal ilarum han paghahadi han rehimen US-Marcos. Dugang nga nahurak an sistema nga dunot ha pinakarubas, atubangan han butaray nga korapsyon ni Marcos ngan igkasi niya burukrata-kapitalista nga kawatan, han paghakin han higante nga karikuhan han ginpaburan nga mga kumprador burges, han naticagrabe nga pandambong han mga langyaw nga kapitalista ha karikuhan han nasud, han hiluagan nga panlulupot ha tuna ngan pakabuhì han masa, ngan han naticagrabe nga pag-aantos ngan pananalumpigos nga nahiaaguman han katawhan Pilipino. Mahugot gud nga ginaaro han sitwasyon an rebolusyunaryo nga pagbabag-o agud igsalikway an daan nga dalan ngan dad-on an nasud ha dalan han katalwasan, demokrasya ngan kauswagan.

Atubangan han nagpapadayon nga krisis han pankalibutan nga sistema nga kapitalista, ginbubutong ha mas hilarum nga krisis an lokal nga ekonomiya han Pilipinas. Pada-

yon nga gin-uulang han imperyalismo nga US ngan mga naghahadi nga klase an pag-uswag han mga pwersa ha produksyon, hinungdan nga nagpapabilin ini nga agraryo, atra-

sado ngan diri industriyalisado.

Waray pa gihapon kapas an lokal nga ekonomiya nga batunon an panginahanglan han katawhan ngan pauswagon an nasud. An lokal nga produksyon nakasarig ha pag-iimport ha mga pankonsumo ngan pamproduksyon nga epektos, ngan nakatadong ha pag-eeksport han mga hilaw o tala la nga naproseso (*semi-processed*) nga materyales, ngan mga epektos nga gin-assembly tikang ha mga gin-import nga mga pyesa. An ekonomiya han nasud padayon nga nakasarig ha langyaw nga kapital ngan pangungutang, bisan kun iginduduso han World Bank nga padakuon an parte han lokal nga

pangungutang.

Tungod ha diri pantay nga negosyuhay, nagpapabilin nga dako an pirmihan nga depisito o pagkalugi ha negosyuhay, nga inabot ha \$54 kabilon hadton 2024 (tikang \$52 kabilon hadton 2023). Ginlalauman nga magpapabilin ini ha pareho nga lebel ha 2025. Binagsak hin masobra 83% an sarplas ha *balance of payments* o balanse ha langyaw nga transaksyon (negosyuhay, kita ngan remitans tikang ha langyaw nga labnasan, pagsulod han langyaw nga pautang, ayuda o pamumuhunan) han Pilipinas, tikang \$3.7 kabilon hadton 2023 ngadto \$609 kamilyon hadton 2024, ha luyo han waray pa pareho kadako nga \$38.34 kabilon nga iginsulod nga remitans han mga migrante nga Pilipino nga trabahador.

Hinitaas an pangungutang han gubyrno ni Marcos ngadto ha ₱17.5 katrilyon hadton Oktubre 2025 (kalakip an ₱5.5 katrilyon o \$93 kabilon nga langyaw nga utang), 40% nga pagdako tikang han liningkod hi Marcos hadton 2022, agud makalapay ha depisito ha negosyuhay, punan an *balance of payments*, ngan pondohan an dagko kundi diri produktibo nga mga proyekto nga pan-imprastraktura.

Padayon nga naghihinay an lokal nga manupaktura tungod ha pagguti han order o pagluya han baligyaan ha pankalibutan nga merkado. Kalakip dinhi an haros 5% nga pagluross han eksport han mga produkto nga elektroniko sugad han mga semikonduktor ha syahan nga parte han tuig, nga nakomponer han dako nga parte han langyaw nga pamumuhunan ha Pilipinas ngan 55%-60% han gin-eeksport han nasud.

Nagpapabilin nga himubo an produksyon ha agrikultura, bisan kun mayda guti nga pagbawi yana nga 2025 tanding ha 2.2% nga paghaligot hadton nakalabay nga tuig. Prinsipal nga hinungdan hini an pagpapabilin nga atrasado han mga higamit, talagudti nga balitang han produksyon, ngan bulnerabilidad ha mga bagyo ngan pagbaha. Mas natikagrabе an lokal nga produksyon ha agrikultura tungod ha liberalisasyon ha importasyon han bugas

(nga inabot ha waray pa katupong nga 4.8 kamilyon tonelada hadton 2024) ngan iba pa nga mga produkto nga nagresulta ha pagkalugi han mga parag-uma ngan pagluya han produksyon. Kapareho nga sitwasyon an nahiaaguman ha sektor han pangisda, manukan ngan babuyan.

Markado an pagdako han ihap han mga nawarayan han trabaho. Tikang Abril 2024 tubtub Abril 2025, gintatantiya nga maabot ha 500,000 nga trabaho ha manupaktura an nawara, kalakip an 76,000 nga trabaho ha sektor han semikonduktor ngan elektroniks. Yana nga tuig, nawara an masobra 300,000 nga trabaho. Gatus-gatus kayukot liwat nga mga drayber han dyip, parupangisda, ngan parupaninda ha merkado ngan iba pa nga gudti nga nagpapakabuhi an gin-aagawan han pakabuhian ilarum han mga programa nga ginpapahimulsan han mga langyaw ngan lokal nga kapitalista.

Ha kabaryuhan, milyun-milyon an nawarayan han trabaho ha naglabay nga mga tuig tungod ha panlulupot han tuna, pagpapaiwas, kumbersyon han yukut-yukot kaektarya nga tuna ngadto ha *real estate*, mga minahan, plantasyon, mga proyekto nga "renewable energy" ngan iba pa. Napipiritan hira nga magin trabahador ha uma, maming han magkalain-lain nga pakabuhian ha agraryo o natural nga ekonomiya, o magtrabaho ha mga sentro nga bungto. Dugang nga pakuri ha masa nga parag-uma an mga palisiya han pasista nga pan-gigipit, labina an pagtatalaan han limitado nga oras ha pagtrabaho ha umhanan nga igin-imponer han mga nag-ooperasyon nga sundalo han AFP.

Pirit nga gintatahuban han gubyrno nga Marcos an grabe nga problema han kawaray trabaho. Agud pagawason nga himubo la an tantos han disempleyo (sumobra-kumulang 95%), diri gin-iihap ha "pwersa han pagtrabaho" an 10-15 kamilyon nga kababayin-an nga waray trabaho (nga mayoriya aada ha kabaryuhan) ngan naghihimo han diri binaydan nga trabaho ha mga panimalay, labot pa ha pira kamilyon nga iginkategorya nga "dismayado nga trabahador" nga diri na namimiling han trabaho. Ha luyo

nga bahin, gin-iihap nira nga "mayda trabaho" bisan an mga "self-employed" ngan mga "unpaid family workers" (nga ha ungod, mga waray mahiagian nga trabaho) nga ha kabug-usan nabug-os hin 13-16 kamilyon o tubtub 34% han ginsesering nga mayda trabaho.

Kun ig-aapi an milyun-milyon nga kababayin-an nga gintanggal ha "pwersa han pagtrabaho" nga igin-kategorya nga "housewives" (asawa nga aada la ha balay) ngan tanggalon ha ihap han "mayda trabaho" an ha aktwal waray naman trabaho, an tinuod nga tantos han disempleyo ha Pilipinas diri mamenos ha 52% o masobra katunga han pwersa han pagtrabaho ha nasud. Diri pa kalakip dinhi an dako nga ihap han "kulang an trabaho" o *underemployed*, nga kadak-an han panahon waray liwat trabaho, kun susumahon, kau-pod an mas dako nga ihap nga aada ha kabaryuhan.

Atubangan han ura-ura kagrabе nga problema ha disempleyo, inabot ha 2.47 kamilyon nga Pilipino an nagpakadto ha iba nga nasud agud magtrabaho hadton 2024, pinakahिताas ha naglabay nga lima kadekada, ngan ginlalauman nga sugad kadamo an ihap han madudugang ha mga migrante nga Pilipino nga trabahador. Sumobra-kumulang naman ha 10 kamilyon an "gig worker" nga katugbang han 22% han kabug-usan nga mayda trabaho. Kalakip dinhi an haros 200,000 nga mga "platform worker." Nahilalakip hini an haros 90,000 nga mga *delivery rider*, nga adlaw-adlaw nag-uunahay ha limitado nga mga order o pasahero, ngan nag-aantos ha grabe nga trapik, samtang gin-iibanan an guti nira nga kita han mga kapitalista nga tag-iya han mga "app."

Natikabagsak pa an lebel han kinabuhi han mayoriya han katawhan, atubangan han dirudiretso nga paghitaas han presyo han mga paplitan, labina han lana ngan pagkaon. Nagpapabilin nga hitaas an presyo han bugas nga aada ha ₱40-₱50 kada kilo. Natikahitaas an gastos ha edukasyon, transportasyon, kalib-sugan, plete ha balay, tubig, kuryente ngan iba pa nga serbisyo, nga kadak-an negosyo han dagko nga kapitalista.

Gintatantiya nga aada na ha ₱1,225 kada adlaw an makaburuhi nga suhol agud disente nga mabuhi an lima-katawo nga pamilya. Sumobra-kumulang katunga la hini an inadlaw nga minimum nga suhol nga ₱695 (tikang Hulyo) ha National Capital Region, ngan mas hirayo an mas himubo nga minimum nga suhol ha magkalain-lain nga rehiyon. Ludlod ha kakurian an masa nga mga trabahador nga nakita la hin minimum nga suhol. Nag-aantos hira ha mga piguot nga payag-payag ha mga syudad, ngan naatubang ha hulga han pagpapaiwas ha ira mga urukyan. Milyun-milyon nga waray pakabuhi an napila ngan andam nga kumarawat hin sensilyo ha mga kontrakwal o panapanahon nga trabaho.

Aada ha kabaryuhan an masa nga parag-uma. Hira an nakomponer han mayoriya han mga produktibo nga klase ha nasud, kundi an kadamuon nira igintatago han mga upisyal nga estadistika han reaksyunaryo nga gubyrno. Agud tagan rason an pagpapasibaya ha kabaryuhan ngan pagawason nga diri agraryo an ekonomiya, diri gin-iihap ha upisyal nga estadistika han reaksyunaryo nga estado an dako nga parte han produktibo nga populasyon ha kabaryuhan kaupod an mga parag-uma nga kababayin-an ngan mga bata nga napartisipar ha produksyon.

Mayoriya ha ira waray kalugaringon nga tuna o mayda la guti nga parsela nga gin-uuma, o nakikiuma la komo saop o tenante, o nagtatrabaho komo mga trabahador ha uma. Nahiaagum hira han natikagrabang mga porma han pyudal ngan bagapyudal nga paniniyupi ngan pananalumpigos, partikular ha porma han hitaas nga plete ha tuna ngan himubo nga suhol. Nabubuktot hira ha pagtrabaho ngan ginpapas-an an hitaas nga gastos ha produksyon, hitaas nga patubo ngan pagkalumos ha utang, himubo nga presyo han ira mga produkto, ngan hitaas nga presyo han paplitan. Mas naggrabe an ira kamutangan tungod ha liberalisasyon ha pag-iimport nga nagresulta ha pagbaha han imported nga bugas, sibuyas, lasuna ngan iba pa nga mga agrikultural nga produkto, ngan pagbaha ha ira mga uma tungod ha pag-

kaupaw han mga kabukiran.

Gatus-gatus kayukot an ginpalayas ha kalugaringon nga tungod ha hiluagan nga panlulupot han tuna han mga agaron maytuna, kumprador burgesya ngan burukrata kapitalista, gin-gagamit an mga korte ngan magkalain-lain nga ahensya han reaksyunaryo nga gubyrno, ngan kaagsuban gamit an pwera han militar ngan pulis, agud tagan lugway an pagpapahiluag han mga plantasyon, minahan, mga proyekto nga ekoturismo, *real estate*, "renewable energy" (sugad han higluag nga *solar farms*) o proyekto para kunuhay ha "climate change mitigation" (sugad han mga plantasyon han kawayan).

Gin-aagawan liwat han pakabuhian an gudti nga parupangisda ngan paragdagat ha panginginlabot han dagko nga komersyal nga *trawler* o barko ha 15-kilometro nga *municipal waters*, sukwahi ha igintalaan han reaksyunaryo nga balaud nga eksklusibo nga gamit han gudti nga parupangisda. Ginhihikawan liwat hira han pakabuhi ha ginhihimo nga reklamasyon han tuna, ngan kun naglalansar an US ngan AFP han pira kaadlaw o semana nga panmilitar nga ehersisyo ha mga baybayon han dagat. Naatubang liwat hira han hulga han pagtitindog han mga "coastal wind energy projects." Pasan liwat nira an bug-at han liberalisasyon ha importasyon han isda, hitaas nga gastos ha pangisda ngan patubo ha pautang.

Nahiaaguman ha bug-os nga nasud an grabe nga epekto han pagbabag-o ha klima. Tungod ini ha paghibang han kabukiran ngan salog nga pira kadekada na nga gindadambong han mga hamad nga langyaw nga kapitalista ngan kunsabo nga lokal nga naghahadi nga klase. Diri masukol an pag-aantos han masa nga anakbalhas ngaduha ha kasyudaran ngan kabaryuhan atubangan han mga grabe nga pagbaha ngan katimpag han tuna, nga nagreresulta han pagkahibang han mga tanum ngan surok han pakabuhian, karuba han mga balay ngan tinagdamo nga pagkamatay.

Agud mapabilin an ira maupay-upay nga panginabuhi, magkulop liwat nga nagtatrabaho an mga mag-

turutdo, mga ordinaryo nga empleyado, gudti nga propesyunal, mga tag-iya han pamasaheros nga sarakyan, gudti nga tindahan o pwesto ha merkado, mga mayda kabatiran nga *freelancer* o *gig worker*, mga *call center agent*, ngan iba pa nga sektor nga nakomponer han klase ng petiburges. Ha butnga han grabe nga pankatilingban nga krisis, an mayoriya ha ira diri nakakatirok hin kwarta para makapanag-iya han kalugaringon nga balay o makapagpatubo han kapital, ngan damo an madagmit nga nabagsak an kamutangan ha panginabuhi han masa nga anakbalhas. Milyun-milyon nga mga kabatan-unan an diri nakakahuman han pag-eskoyla ha kolehiyo tungod ha hitaas nga sukot ngan kagarastuhan.

Langit ngan tuna an giutan han panginabuhi han masa han katawhan Pilipino ngan pipira nga naghahadi nga klase. Samtang natikabagsak an panginabuhi han masa nga Pilipino, tikadako naman an ginhahakin nga karikuhan han dagko nga kumprador burgesya, agaron maytuna ngan burukrata kapitalista. Tikang han lumingkod hi Marcos, an gintirig-ob nga karikuhan han tulo nga pinakariko ha Pilipinas—hira Enrique Razon, Manuel Villar ngan Ramon Ang—dinako hin 56% tikang ₱485.5 kabilyon ngadto ₱1.3 katrilyon, samtang an ha 50 nga pinakariko tinubo hin 25% tikang ₱979 kabilyon ngada ₱4.9 katrilyon, hirayo ha iginhatag nga 7.5% nga umento ha suhol han mga trabahador ha National Capital Region yana nga tuig.

Samtang ludlod ha lapok han kakurian an masa nga anakbalhas, nabubuhi hin garboso ngan huralwa an mga naghahadi nga klase. Ginmalmagastar nira an karikuhan ha ira mga mansyon ngan marahalon nga sarakyan, pribado nga *resort* ngan mga yate, bulawan nga mga relo ngan alahas, pagkakasino ngan agsub nga pagbiyahe ha iba nga nasud sakay han ira kalugaringon nga mga edro.

Naghahakin hira han higante nga karikuhan ha pakigsosyo ha mga langyaw nga dagko nga kapitalista ngan bangko, komo mga ahente ha pag-eeksport han mga hilaw nga materyales (mga mineral, prutas, kopra, karikuhan ha kadagatan, go-

ma), pag-iimport han mga human nga epektos ngan higamit, ngan komo manedyer han mga langyaw nga mamuruhunan ha mga kompaniya nga nagsisingabot ha barato nga kusog pagtrabaho para ha asembleya para ha pag-eeksport. Hira an aada ha likod han panlulupot han tuna, pagsasapribado ngan pagnenegosyo ha mga pampubliko nga serbisyo sugad han kuryente, tubig, telekomunikasyon ngan transportasyon. Katin nira an pinakadagko nga bangko, mga kompaniya ngan konglomereyt kalakip an International Container Terminal Services (ICTS), SM Investments, BDO, SM Prime, Meralco, BPI, San Miguel Corporation, Ayala Land, PLDT, China Bank ngan iba pa nga dagko nga korporasyon. Hira an nagpondo ngan nasuporta ha pinakadako nga pampulitika nga partido, ngan nagpupulos ha pabor han gubyerno ha mga kontrata, balaud, proyekto nga pan-imprastraktura ngan mga desisyon han korte.

Kabakyang han naghahadi nga klase an imperyalismo nga US ha pagpapabilin nga atrasado han nasud. Waray hira interes nga igpundar an batakan nga mga industriya ngan pauswagon an agrikultura, o ig-undong an ekonomiya nga nakakapaglugaring. Naghahakin hira han karikuhan tikang ha pagin atrasado han nasud.

An naghahadi nga klase prinsipal nga gintataglawas yana han lunod-patay nga niyutiyo nga rehimen Marcos. Ginpapamunuan niya an estado nga neokolonyal, nga an prinsipal nga harigi amo an Armed Forces of the Philippines (AFP) nga ginkokontrol han imperyalismo nga US. Atubangan han natikagrabe nga ribalay ha China ha naglabay nga dekada, dugang nga ginpahugot han imperyalismo nga US an kontrol ha Pilipinas. Naggrabe an panginlabot militar han US pinaagi han natikadako pa nga Balikatan Exercises, nga iginlalansar ilarum han Mutual Defense Treaty, Visiting Forces Agreement, Enhanced Defense Cooperation Agreement (EDCA) ngan iba pa nga diri pantay nga panmilitar nga kasarabutan han US ngan Pilipinas.

Ilarum ni Marcos, natikadako pa an presensya han mga tropa,

mga sarakyan ngan higamit pangerra han US ha Pilipinas. Gin-abrihan han US an dugang nga sikreto nga mga EDCA *site* para magserbe nga kampo han mga tropa ngan panmilitar nga tagsagdon han US, ngan istakan han mga misayl ngan iba pa nga higamit han US. Kasumpay ini ha tikadako nga panmilitar nga presensya han US ha rehiyon han Asia kakunsabo an mga niyutiyo nga gubyerno ha Japan ngan South Korea. Sagunson an mga pangerra nga ehersisyo ngan pagmamaniobra han mga pwersa militar han US. Ginsisingabot han imperyalismo nga US an banggaay han Pilipinas ngan China ha South China Sea agud magduso han armado nga sumpakiay. Gin-gagamit hini an lunod-patay nga maka-US nga grupo nga Akbayan komo sibilyan nga tagasulsol han gerra, ngan tagapaypay han Sinophobia o sentimyento nga kontra-China agud igladawan an US nga "kaugop" o "tagdependa" han soberaniya han Pilipinas.

Iginlaladawan han mga upisyal han gubyerno han US nga aada ha "hyperdrive" o ura-ura kahitaas nga lebel an "kooperasyon" han US ngan Pilipinas, atubangan han waray katupong nga panginlabot militar hini ha nasud. Igintukod diri pala maiha han US an Task Force Philippines agud mas pahugton an kontrol ha AFP, ngan mas epektibo nga gamiton ini ha mga panmilitar nga operasyon han US ha Pilipinas. Kasunod hini, ginpadig-on han Kongreso han US an Philippines Enhanced Resilience Act o PERA nga mag-aalutaga ha Pilipinas han mabot ha \$500 kamilyon nga tinuig nga Foreign Military Financing o kabugusan nga \$2.5 kabilyon tikang 2026-2030, masobra napulo kabeses han kasagaran nga igin-aalutaga nga ayuda militar ha nasud.

Ludlod ha pampulitika nga krisis an neokolonyal nga estado atubangan han natikagrabe nga banggaay han mga magkaribal nga barkadahan han naghahadi nga klase, ngan kahimulag ha katawhan han pasista ngan lanong ha korapsyon nga rehimen Marcos. Nagin landaw ha naglabay nga tuig an pagtugot ni Marcos ha pagdakop ngan pagpriso ha hadto anay tiraniko nga presi-

dente nga hi Rodrigo Duterte ha mga pasilidad han International Criminal Court ha The Netherlands tungod ha mga kaso han krimen kontra ha bug-os nga katawhan kasumpay han tinagdamo nga panmatay ha buwa nga "war on drugs." Nagin mapintas liwat an sumpakiay ha nahunong nga *impeachment* kan Sara Duterte nga iginduso han hiluag nga ranggo han mga progresibo nga pwersa, kabakyang an mga karibal han mga Duterte ha kongreso. Kundi ha kahadlok nga hiya an igusunod, iginpahunong mismo ni Marcos an pagbista ha Senado, kakunsa bo an mga kaalyado ni Duterte.

Nahitabo an usa ha pinakadunot nga reaksyunaryo nga eleksyon hadton Mayo, diin nagin butaray an panlibo, pagbaha han ginkorap nga kwarta para igpalit han botos, kamadarahug, ngan pampulitika nga akomodasyon nga gin-areglo han mga opereytor han US. Espiho ini han dunot nga naghahadi nga pampulitika nga sistema. Ha luyo nga bahin, nagin mahinungdanon an pagpartisipar han mga progresibo ngan patriyotiko nga partido ha eleksyon, bisan kun gintatarget hira han pan-gigipit han mga armado nga pwersa han estado. Nalalain an ira mga kandidato ha mahugot nga pagdadara han mga hingyap han masa, pagbubuksas ha dunot nga eleksyon ngan pag-uundong ha nasunal ngan demokratiko nga hingyap han katawhan.

Ha butnga han grabe nga krisis ha ekonomiya ngan pagbagsak han pakabuhi han hiluag nga masa han katawhan, naglarab an hiluag nga kangalas ha korapsyon ngan pandambong ha pondo han nasud. Nabuksas ha mga pampubliko nga imbestigasyon an higante nga pondo han nasud nga ginkawat han mga burukrata kapitalista ha maanomaliya ngan palpak nga *flood control* nga proyekto, ngan pagbursa han gatus-gatos kabilyon piso nga kikkak han mga upisyal han Department of Public Works and Highways (DPWH), mga kongresista, senador, ngan higtaas nga upisyal han Malacañang.

Tikang Septyembre, pira kabulan nga nagrabinos an kontra-korapsyon nga kagiusan protesta, ha pangunguna han mga kabatan-unan

nga estudyante, an kasagaran nga gintatawag nga Generation Z o Gen-Z, kapareho han mga protesta ha iba nga nasud. Kundi diri sugad han dali la nga paglarab ha iba nga nasud, nagdirudiretso an protesta han mga kabatan-unan nga estudyante ha Pilipinas, ha payong han nasyunal-demokratiko nga mga pwersa. Inapi ini ngan kumuha han kusog ha paggios han magkalain-lain nga demokratiko nga sektor.

Atubangan han mga protesta, nabuksas han hadto anay kakunsabo nga kongresman ni Marcos nga hiya mismo kumarawat hin ₱25 kabilyon nga "SOP," ngan hiya mismo an utok ha likod han pagpasulod han mga maanomaliya nga proyekto ha badyet han iya gubyerno. Agud talwason an iya kalugaringon, napwersa hi Marcos nga ig-sakripisyo an mga suok niya nga upisyal nga gin-ngaranan nga dabi ha pangungurakot, butang nga naghimo hin butak ngan nagpagra-be han sumpakiay giutan han mga magkaribal nga barkadahan ha sakob han Malacañang. Pinaagi han kunuhay imbestigasyon nga igin-mando ni Marcos, pirit nga gintatahuban an iya direkta nga baratonon ha korapsyon ha mga *flood-control* nga proyekto nga ginpondohan ha iya direkta nga mando ilarum han "unprogrammed appropriations."

Ha pagrumpagas han kagiusan protesta nabug-os an hiluag nga mga alyansa nga kontra-korapsyon ha bug-os nga nasud. Kinusog an guliat han mga mga pogresibo ngan demokratiko nga grupo, labina han mga kabatan-unan, para ha pagpapabul-iw o pagpapatalsik kan Marcos ngan Duterte, bisan pa gin-aten-tar han *pseudo*-progresibo (peke nga progresibo) nga grupo nga Akbayan nga isimang an kangalas han katawhan kan Marcos. Igin-aabante an proposisyon nga tukuron an usa nga "national transition council" nga masaliwan ha gubyerno nga Marcos-Duterte, igduso an pagse-seguro han nga pitad agud papagbatunon an mga nadabi ha korapsyon, ngan igpatuman an mga pagbabag-o han sistema ha eleksyon ngan panggubernuhan. Bisan kun aada pa gihapon ini ha balayan han presente nga sistema, ngan diri

magdadara han pundamental nga pagbabag-o ha sistema, an sugad nga panawagan espiho na gud han hilarum nga pagkadismaya ngan kawaray pagtapod han katawhan ha reaksyunaryo nga sistema ngan ha mga naghahadi nga klase, atubangan han paura-utro nga kaso han korapsyon ha naglabay nga mga dekada.

Agud pugngan an pagdako han mga gios protesta ha kakalsadahan, gin-gamit ni Marcos an mga pwersa han pulis ngan militar ha pagpuyoy ha mga demokratiko nga katungod. Hadton Septyembre 21, ha ika-53 nga anibersaryo han balaud militar, masobra 270 an gin-aresto ha Mendiola han maglarab an komprontasyon giutan han mga pulis ngan mga kabatan-unan nga maisugon nga inato. Ha rali hadton Nobyembre 30, ginhimo nga baga garison (kuta) an Malacañang nga ginpalibutan han yukut-yukot nga mga pulis agud diri makaapiki ha Malacañang ngan diri mabatian ni Marcos an mga guliat han katawhan.

An nagin pagpuyoy ha mga rali usa nga parte la han natikagrabeng pasista nga panmuyoy han rehimen Marcos. Igin-gawas ni Marcos yana nga tuig an National Action Plan for Unity, Peace and Development (NAP-UPD) nga yana nagse-serbe nga plano ha hiluagan nga panmuyoy ha mga demokratiko nga katungod ha balayan han kontra-insurhensiya. Gin-gamit hini an Anti-Terror Law ngan Anti-Financing Terrorism Law agud gipiton an mga panmasa nga asosasyon ngan mga organisasyon han *civil society* (komunidad han mga molupyo), dabihon ini ha rebolusyunaryo nga kagiusan, ngan puyuyon an ira mga aktibidad.

Ha kasyudaran, ginhihimo han mga ahente han estado an sarbeylans, pan-gigipit ngan panhadlok agud pugngan an pag-uunyon han mga trabahador ngan pag-oorganisa han mga kabatan-unan ngan iba pa nga sektor. An mga kilalado nga lider o napartisipar ha mga gios protesta target han "pagbisita ha balay" han mga pulis agud "kumbinsihon" hira nga bumaya ha ira mga organisasyon ngan diri pumar-tisipar ha mga paggios. Wala-tuo

an pagsalawad han hinimu-himo nga kaso, kalakip an tarhug nga pagkakaso han pulis ha masobra 90 nga lider kabatan-unan ngan mga pinartisipar ha rali hadton Septyembre 21 ha Mendiola.

Ha balayan liwat han NAP-UPD, padayon nga igin-iimponer han AFP, kakunsabo an NTF-Elcac, an diri deklarado nga balaud militar ha gatus-gatos nga barangay ha bug-os nga nasud. Iginpapatuman an mga pitad nga mapanmuyoy ngan matalumpiguson ha masa nga parag-uma, kalakip an pagtatalaan han limitado nga oras ha pagtrabaho han mga parag-uma ha iya uma, pagpapapirma han *logbook* ha paggawas o pagsulod ha baryo, pagtalaan han limitado nga kadamuon han bugas nga poyde paliton, pag-imponer han karpyu, ngan iba pa nga palisiya han pagkontrol han gios han residente. Igindeploy an mga grupo han mga sundalo ha mga barangay o klaster han mga baryo han mga parag-uma, labina an mga gintatahapan han AFP nga nasuporta ha rebolusyunaryo nga kagiusan, ha ngaran han pagpugong ha pagsuporta ha Bagong Hukbong Bayan (BHB).

An imperyalismo nga US an prinsipal nga tagsagdong ngan tagahatag han suporta nga pinansya ngan materyal ha kontra-insurhensiya nga operasyon ni Marcos ngan han AFP. Waray hunong an pagsulaysukay han AFP ha mga baryo ngan mga operasyon kontra ha BHB. Padayon an mga *triad* o operasyon nga saywar, intelidyens ngan kombatan, ha desperado nga pag-aten-tar nga perdihon an hukbo han katawhan o pugngan an mga pwersa nga gerilya nga magburuhaton masa ha mga baryo. Ha mga lugar nga aada ha ilarum han *focused military operation* han mga dibisyon ngan *area command* han AFP, iginlalansar an hiluagan nga operasyon ha mga magsaragpit nga gintutuoran hini nga mga sona gerilya han BHB. Barubatalyon an gin-gagamit han AFP agud lanaton an mga platun gerilya o iskward han hukbo han katawhan. Kadungan hini nga gin-gagamit an iskema nga amnestiya para ha saywar. Tikang 2023, gin-gamit ni Marcos ngan iya mga suruguon an sikreto nga pa-

kig-erestorya ha NDFP ha pag-a-
tentar nga ilit-ag ini ha erestorya
han pagsurender han rebolusyunar-
yo nga kagiusan.

Nagpapasarang liwat ini han
mga iskwad o grupo han mga pa-
sista nga sundalo, danay napostu-
ra nga mga gerilya nga pwersa ha
pag-atentar nga uwaton an masa.
Nagamit liwat an AFP han magraut
nga elemento ha baryo agud ilusot
an mga elektroniko nga higamit
(GPS *tracker*) ha pwesto han mga
yunit gerilya, agud puntiryahon an
mga Pula nga mangaraway han pa-
nganganyon, istraping ngan pan-
momba tikang ha kahanginan gamit
an mga FA-50 *jet fighter* o Super
Tucano nga pan-atake nga edro.

Diin man ngan kan-o man gin-
hihimo han AFP an mga kontra-ge-
rilya nga operasyon, kaupod ha
mga target hini an masa nga pa-
rag-uma ha baryo. Kada mayda ar-
mado nga engkwentro, pwersahay
nga ginpapa-ebakwet an masa ha
ira mga baryo komo pagsirot ha
mga residente nga gintuturan han
mga pasista nga upisyal han AFP
nga nasuporta ha BHB. Ha nakala-
bay nga tuig, masobra 7,600 nga
mga parag-uma an biktima han
pwersahay nga ebakwasyon.

Kaparte hira han kabug-usan
nga haros 240,000 nga nagin bikti-

ma han pasista nga panmuypoy
ngan pandarahug han rehimen US-
Marcos tikang Disyembre 2024.
Kaupod dinhi an 40 nga biktima
han pagpatay, 34 nga ilegal nga
pagsikmit, ngan masobra 300 nga
pagtortur. Prinsipal nga target
han pasista nga rehimen US-
Marcos an mga grupo o pwersa nga
aktibo ha pagdepensa ha katungod
han masa nga parag-uma ngan
trabahador, nagpapasulong han
nasyunal ngan demokratiko nga
hingyap han nasud.

Sukwahi ha kasarabutan han
reaksyunaryo nga gubyrno ha
mga pwersa nga Moro nga nakilala
ha naglulugaring nga gubyrno han
Bangsamoro Autonomous Region of
Muslim Mindanao, padayon nga
ginpapanginlabutan ni Marcos
ngan igin-iimponer an iya otoridad
ha mga internal nga karukayaknon
han Bangsamoro Transition Autho-
rity, nga pira kabeses na nga nade-
latar an paglansar han eleksyon.
Namemeligro yana an kasarabutan
pankamurayawan atubangan han
kapakyasan ni Marcos nga sundon
an mga obligasyon han gubyrno
nga Manila ha luyo han pagsuren-
der han armas han pira kayukot
nga pwersa han Bangsamoro Isla-
mic Freedom Fighter ngan Moro
Islamic Liberation Front. Padayon

an reklamo han masa nga Moro han
pangabuso han mga pasista nga
pwersa han AFP kontra ha ira mga
katungod.

Kapareho han pauru-utro nga
iginpakita ha kasaysayan, waray
bisan ano nga grabe nga pasista
nga panmuypoy an makakapugong
ha pagbangon han katawhan. Nga-
ni, samtang natikagrabe ngan nati-
kahiluag an panmuypoy, mas nag-
kukusog an paghihingyap han na-
sud nga dumepensa ngan umato.

Atubangan han natikahilarum
nga krisis han bagakolonyal ngan
bagapyudal nga sistema ha Pilipi-
nas, ngan kadungan hini nga
paggrabe han pag-aantos ngan
pagkukuri han katawhan, an sit-
wasyon naghihimo hin maupay nga
kundisyon para ha pagpasulong
han demokratiko nga rebolusyon
han katawhan. Kinahanglan hakbu-
ton han Partido an higayon agud
mas makapahiluag ngan magpadig-
on ha balayan han pagkumpleto
ngan pagpapahilarum han kagiusan
pagtutul-id. Kabakyang an tanan
nga rebolusyunaryo nga pwersa,
kinahanglan dungan nga magpaka-
batid ha buruhaton masa agud pu-
kawon, organisahon ngan pagiison
an milyun-milyon nga katawhan ha
dalan han rebolusyunaryo nga pa-
kigbisog.

III. Sitwasyon ngan mga buruhaton para dugang nga pakusgon an Partido ngan rebolusyunaryo nga kagiusan

Ha duso ngan giya han kagiusan pagtutul-id ha naglabay nga duha katu-
ig, padayon nga ngatanan-nga-gapil nga nagpapakusog an Partido ha
ideolohiya, pulitika ngan organisasyon. Bug-os an determinasyon han mga
kadre ha ngatanan nga lebel han Partido nga tudlukon, susnan ngan ungba-
wan an mga nagin kaluyahan ngan pagsasayop ha nakalabay ngan dad-on ha
bag-o nga balitang an aton rebolusyunaryo nga praktika.

Klarado kaupay nga iginpapaki-
ta han grabe nga krisis han bagako-
lonyal ngan bagapyudal nga sistema
ha nasud ngan han pankalibutan
nga kapitalista nga sistema nga
nagpapabilin nga tukma, makatadu-
ngan ngan mahugot an pangina-
hanglan nga ipasulong an demokra-
tiko nga rebolusyon han katawhan
ha Pilipinas. Ini la an pamaagi agud
hul-os nga matalwas an katawhan
Pilipino ha pananalumpigos han im-

peryalismo, pyudalismo ngan bu-
rukrata kapitalismo, ngan ipundar
an maranggat nga sosyalista nga
kabuwason.

Tikang ha nahiaguman nga mga
pag-atras ngan kahibangan han
Partido ngan rebolusyunaryo nga
kagiusan, nakab-ot naton ha nagla-
bay nga tuig an igo-igo nga mga
pag-abante ha magkalain-lain nga
natad han rebolusyunaryo nga bu-
ruhaton, bisan kun mayda pira nga

parte nga nauurhi, ngan mayda pira
nga nahiagum han kahibangan du-
rot han diri pa hul-os nga natutul-id
nga mga kaluyahan ngan atubangan
han waray wantas nga pangatake
han kaaway.

Kabakyang an tanan nga rebo-
lusyunaryo nga pwersa, dugang nga
nagpapakusog an Partido agud ma-
muno ha pagpapasulong han de-
mokratiko nga rebolusyon han ka-
tawhan pinaagi han panmaihaan
nga gerra han katawhan. Maupay
yana nga nakapwesto an Partido
agud pamunuan an hiluag nga masa
han katawhan ha ngatanan nga na-
tad han pakigbisog, prinsipal ha na-
tad han armado nga pakig-away.

Dugang naton nga ginpadig-on
an pan-ideolohiya nga pundasyon

han Partido tikang han gintikangan naton hadton 2023 an kagiusan pagtutul-id ha Marxismo-Leninismo-Maoismo ngan ha mga bataan nga prinsipyo han Partido. Katuyuanan han kagiusan pag-aram an igalikway, prinsipal an empirismo, sekundaryo an dogmatismo ha ideolohiya; igalikway an konserbatismo, liberalismo, ikogismo ngan sektoralismo, ha pulitika; ngan an burukratismo ngan ultra-demokrasya ha organisasyon. Pinaagi han susnanay ngan pagsuson-ha-kalugaringon, kadungan an pagtutul-id, dugang nga ginpapakusog an pagkaurusa han mga kadre ngan komite han Partido.

Ha pangunguna han Komite Sentral, dugang nga ginpapahilarum an kagiusan pagtutul-id pinaagi han pagsusuma ha aton mga eksperyensya. Nakuha kita han mga leksyon ha syahan ngan ikaduha nga dakila nga kagiusan pagtutul-id, samtang nalingi kita ha kasaysayan han pagtutukod ngan pagpahilug han Partido tikang han tukuron ini 57 katuig na an nakalabay.

Padayon nga ginpapakusog ngan ginpapauswag han mga kadre ngan komite han Partido an pankalitingban nga imbestigasyon ngan pag-analisar ha klase (SICA o *social investigation and class analysis*) ha lugop han kada iya pamumuno. Katuyuanan ha pagbubug-os an pagpapahilarum han mga SICA an tudlukon an mga nangunguna nga problema ngan mga isyu nga ginkakahitapo han hiluag nga masa, labina an mga porma han pananalumpigos ngan paniniyupi ha mga bataan nga klase ngan sektor, ngan an haum nga mga pamaagi o taktika agud igpatuman an hiluagan nga pagpupukaw, pag-oorganisa ngan pagpagios ha ira. Ha basaranan la han paghimo han SICA mabubug-os an tukma nga plano ngan panawagan nga seguridad nga hahangkupon han masa ngan magpaparayhak han ira mga pakigbisog.

Komo baton ha panawagan han Partido, dirudiretso nga ginpapahilug ngan ginpaparayhak an mga rebolusyunaryo nga organisasyon masa han mga trabahador, parag-uma, kabatan-unan, kababayin-an, magturutdo, trabahador pankalibsan,

tawo ha singbahan, syentista, abogado, minoriya nga katawhan, migrante ha gawas han nasud ngan iba pa. Pinaagi han mga rali ngan magkalain-lain nga porma han pagpropaganda, ginpapakusog nira an panawagan nga ipasulong ngan pumartisipar ha gerra han katawhan.

Gintitirok ngan ginkokonsolida nira an abante nga parte han masa nga napartisipar ha mga panmasa nga pakigbisog. Nagseserbe hira nga sikreto nga butagtok han hiluag nga dayag nga kagiusan masa nga naggigiya agud diri masimang ha repormismo an masa ha ira mga pakigbisog. Ha kasyudaran, natikakusog an panawagan para ha pagpapalista, labina tikang ha ranggo han mga petiburges nga intelektwal, agud kumadto ha kabaryuhan para ha temporaryo o panmaihaan nga deployment. Diri madidiwara an ira nagigin amot ha pagpaparayhak ha buruhaton pan-edukasyon, pankultura ngan iba pa nga aspeto han buruhaton ha hukbo han katawhan.

Subay ha palisiya han maisugon nga pagpapahilug nga waray ginpapasulod bisan usa nga diri maupay, madig-on naton nga ginpapahilug an ranggo han Partido pinaagi han pagrerekrut tikang ha bag-o nga tubo nga mga rebolusyunaryo nga kagiusan masa, ngaduha ha kasyudaran ngan kabaryuhan. Nahihi-mo ini tungod kay an mga kadre ngan kaapi han Partido aada ha rubas han mga panmasa nga pakigbisog ngan kaupod han masa ha ira mga paggios. Nakasarang hira ha bug-os nga nasud.

Kun diin mayda diri mamenos ha tulo nga kaapi, ginbubug-os naton an sanga han Partido komo bataan hini nga organisasyon. An pagpapa-damo ngan pagpapakusog han mga sanga an suklanan han kahiluagon ngan kahilarumon han pagkakagamot han Partido ha masa, ngan han kapas hini nga pamunuan an masa ha rebolusyunaryo nga dalan. An mga sanga han Partido an aada ha rubas ngan taliba han mga rebolusyunaryo nga organisasyon masa ngan han ira mga nasyunal ngan demokratiko nga mga pakigbisog.

Ha kasyudaran, igintutukod naton an mga sanga ha mga pabrika ngan lugar han pagtrabaho ha mga

kablas nga komunidad, ha mga eskolahan, upisina, ngan iba pa nga lugar. Ha kabaryuhan, ginbubug-os naton an mga sanga han Partido ha mga baryo o klaster han mga baryo. Ha mga lugar nga nabuhag atubangan han panmuypoy han kaaway o iba nga rason, yana pursigido ini nga utro nga gintutukod.

Partikular ha kabaryuhan, an pagtutukod han mga sanga ngan komite han Partido an yawe agud pamunuan an hiluag nga masa ha ira mga pakigbisog para ha reporma ha tuna, ngan ha armado nga pakig-away. Ha pamumuno han Partido, gintutukod an mga Komite nga Rebolusyunaryo ha Baryo, o organo han pampulitika nga poder nga amo an nagkakaurusa nga prente ha baryo, ha pundasyon han mga bataan nga panmasa nga asosasyon han mga parag-uma, kabatan-unan, kababayin-an ngan mga bata, ngan mga trabahador pankultura, kaupod an mga rebolusyunaryo nga asosasyon o kaurusahan han mga butnga nga pwersa ha baryo. Dugang dinhi, ginbubug-os han Partido an alyansa giutan han taghimaryo, ha masa ngan namumutngaan nga pwersa ha mga kabungtuhan.

Gin-aarmasan han Partido an masa. Ginbubug-os ngan ginpagios naton an mga yunit han milisya han katawhan komo pormasyon han Bagong Hukbong Bayan, kabakyang an mga yunit pandepensa ha kalugaringon han mga panmasa nga asosasyon, agud ipasulong an hiluagan nga ginerilya nga pakiggerra. Diin man nakabug-os, an mga yunit han milisya han katawhan nabulig ha pagpapakusog han mga pultaym nga yunit han hukbo han katawhan diin mayda nakatindog, ngan kun diin waray, nag-iinisatiba nga tukuron an mga bag-o nga yunit gerilya han hukbo han katawhan. Kun diin poyde bug-uson, pahiluagon ngan pakusgon an mga pwersa nga gerilya han BHB, igintutukod han Partido an mga sona ngan prente gerilya komo lansaran han armado nga pakig-away para ha paru-parte nga pagperdi ha kaaway.

Ha giya ngan inspirasyon han kagiusan pagtutul-id, padayon nga ginpapakyas han Partido an waray hunong nga terorista nga gerra

ngan saywar han imperyalismo nga US ngan pasista nga rehimen Marcos, ha deklarado nga katuyuanan hini nga perdihon an Partido, an Bagong Hukbong Bayan ngan bug-os nga rebolusyunaryo nga kagiusan. Diri mapeperdi an Partido tungod kay angkon hini an diri nagpapapas nga katangkuran ha proletaryo nga ideolohiya, prinsipyo ngan kawsa, ngan an ginpanday ha kalayo nga determinasyon nga pagserbihan an katawhan.

Dirudiretso nga ginpapakyas han BHB an mga "nakapokus nga panmilitar nga operasyon" han AFP pinaagi han paghihikaw dinhi han pokus o target. Mayda pira pa nga nahibang, nga kaagsuban dara han internal nga mga kaluyahan. An dirudiretso nga pagpupursige han BHB ha magkalain-lain nga rehiyon dako nga tampalo ha pasista nga hi Marcos nga hul-os nga kahambog nga nagdeklara hadton Hulyo nga "waray na han grupo nga gerilya" ha nasud.

Katin an mga leksyon han kagiusan pagtutul-id, ginhimo an paghingayad ha organisasyon ngan kumand han hukbo han katawhan agud malupgop ngan makagios ini ha mas hiluag nga erya, ngan mas madagmit ngan mas sikreto nga nakakagbarubalhin. Ha kabug-usan, nahipapabilin nga bungol ngan buta an kaaway, mas nalilikyan an mga dependensiba nga agway, napreserbar an kusog ngan hinay-hinay nga utro nga nakapagpahiluag an BHB. Nabawi o nabalikan hini an mga base hini hadto, samtang nakapagpahiluag ha mga bag-o nga erya. Ha determinasyon nga umato ngan aktibo nga pagdependensa, nasasagang ngan napeperdi han BHB an mga atake han kaaway. Tigaman han pagbawi, mayda pira nga yunit nga nakaglangsar hin gudti nga taktikal nga opensiba. Mayda mga yunit nga mas abante an eksperyensya ha pagtutul-id ngan utro nga pagpapakusog, samtang mas damo pa an naglalanat, ngan mayda pira pa nga nauurhi.

Yawe hini ngatanan an hugot nga sumpayan ngan hilarum nga paggamot han BHB ha masa, ngan an paghaum han organisasyon ngan mga ginerilya nga taktika han paggios han hukbo. Agud mahimo ini,

ginpaparayhak han mga Pula nga mangaraway an pagbulig ha masa ha produksyon, paghahatag han serbisyo pankalibsugan ngan edukasyon, ngan pagpapakusog han buruhaton pankultura. Nabulig an BHB ha pagbubug-os ngan pagpapahilarum han mga SICA, pag-uurusa ha masa ngan paghitaas han ira determinasyon nga dependensahan ngan ipakigbisog an ira kaupayan.

Padayon liwat nga gin-aatuhan han BHB ngan mga rebolusyunaryo nga pwersa an waray hunong nga mga operasyon nga intelidyens, saywar ngan pagpapasurender han kaaway ha tahub han "lokalisado nga erestorya pankamurayawan." Pursigido naton nga iginbubuksas nga waray pulos an iginsasaad han AFP ngan NTF-Elcac nga "maupay nga kinabuhi" prinsipal ha rason nga diri hini ginsosolbar an batakan nga problema han kawaray tuna, ngan labina tungod kay puros magraut an iginrarakudako nga mga programa ha "reintegrasyon." Iginbubuksas liwat an tadtad han korapsyon nga mga peke nga "pankawagan nga proyekto" nga pan-imprastruktura nga ginbubuhusan han bilyun-bilyon kapiso, nga iginbubursa han mga panmilitar nga upisyal ngan kakunsabo nga kontraktor. Mas importante, iginbubuksas nga an tinuod nga katuyuanan han iginsasaad nga "kamurayawan" amo an pagpupoy ha masa agud libre nga makasulod an mga langyaw nga kapitalista ngan kakunsabo nga mga parupanlupot han tuna ngan natural nga karikuhan.

Ha naglabay nga mga tuig, mayda gud pira nga elemento nga nagtraydor ha Partido ngan naglingo ha masa. Sobra hira yana nga nahimumulag ha masa ngan hul-os nga ginkakangalsan. Damo ha ira an iginbasura ngan ginpasibayan na han kaaway kahuman mawarayan pulos ha saywar. An mga pinakalanong nga nagin kriminal nga aset han kaaway ginkakasuhan ha husgado han katawhan ngan ginpatukan han haum nga sirot nga ginde-manda han masa, katugbang han sala nga ira nahimo.

An dako nga mayoriya, an 99%, han mga kaapi han Partido ngan mga rebolusyunaryo nga organisasyon

masa, nagpapabilin nga tangkod ha mga prinsipyo ngan kawsa han Partido. Mayda mga parte nga nagin pasibo tungod ha grabe nga pasista nga panmuypoy. Kundi paspas hira nga utro nga natitirok kahuman malamrangan ha mga buruhaton nga kinahanglan papelan.

Pinaagi han paninindugan para ha makatadungan ngan panmaihaan nga kamurayawan, padayon liwat nga ginpapakyas an mga pag-aten-tar han rehimen US-Marcos nga iduso an National Democratic Front ha lit-ag han pagsurender ha armado nga rebolusyon. Ha naglabay nga duha katuig, waray nagin mahinungdanon nga pag-abante ha mga erestorya han mga tinaglawas han NDF ngan han Gubyerno han Republika han Pilipinas (GRP) agud utro nga buhion an pormal nga erestorya pankamurayawan.

Prinsipal nga hinungdan han pagkahunong han erestorya pankamurayawan amo an panmimirit ni Marcos nga igbasura an ngatanan nga nabug-os nga kasarabutan ha naglabay nga 30 katuig han negosasyon han NDFP-GRP, kalakip an The Hague Joint Declaration, an Joint Agreement on Safety and Immunity Guarantees (JASIG), an Comprehensive Agreement on Respect for Human Rights and International Humanitarian Law ngan iba pa. Iginpapakita ni Marcos nga diri niya kay tindugan an pirma han GRP, butang nga nakakahibang ha pagtapod han NDFP ngan katawhan.

Ginpipirit ni Marcos nga "utro nga tikangan" an erestorya ha bala-yan han "demobilisasyon ngan pagdidis-arma" ha BHB, nga diri anay ginsosolbar an mga bakatan nga problema han katawhan, nga amo an gamot han gerra sibil ha nasud. Madig-on nga naninindugan an delegasyon han NDFP kontra hini nga larang. Kun diri babag-uhon han rehimen Marcos an militarista nga tindog hini ha erestorya, nakaandam an rebolusyunaryo nga pwersa nga igsuspendir an pakig-erestorya ha GRP, tubtub nga masaliwnan hi Marcos han kunta mas abrido an hunahuna nga resolbahon an mga batakan nga problema ha tuna ngan kawaray hustisya. Mayda man o waray erestorya pankamurayawan ha

GRP, bug-os an determinasyon han Partido nga ipasulong an mga rebolusyunaryo nga pakigbisog agud ipakigbisog an nasyunal ngan demokratico nga hingyap han katawhan.

Maupay gud an obhetibo nga sitwasyon ha sakob han nasud ngan ha bug-os nga kalibutan agud ipasulong an mga rebolusyunaryo nga pakigbisog. Masesering liwat nga maupay an suhetibo nga sitwasyon—nga tungod ha kagiusan pagtutul-id, an Partido ngan ngatanan nga rebolusyunaryo nga pwersa aada yana ha mas maupay nga katindog, tanding ha nakalabay nga duha katuig, agud hakbuton an mga oportunidad agud pamunuan an hiluagan nga pagpasulong han demokratico nga rebolusyon han katawhan ha mga tiarabot nga tuig. Sugadman, dagko gud an aatubangon naton nga ayat ngan magbug-at an buruhaton nga kinahanglan naton sugbungon ha maabot nga usa o duha katuig para pakusgon an Partido ha ideolohiya, pulitika ngan organisasyon, agud maisa an kapas hini nga pagiuson an milyun-milyon nga katawhan ha dalan han demokratico nga rebolusyon han katawhan pinaagi han panmaihaan nga gerra han katawhan.

Ha ideolohiya, kinahanglan padayon nga pahilarumon ngan pahiluagon an kagiusan pagtutul-id ha pagsulod hini ha ikatulo katuig, nga mayda walo nga parte o aspeto: usa nga Marxista-Leninista-Maoista nga kampanya han pag-aram, usa nga kampanya para ha hilarum nga pag-aram ha konstitusyon ngan programa han Partido, usa nga kampanya han utro nga pag-aram ha mga dokumento han Syahan ngan Ikaduha nga Dakila nga Kagiusan Pagtutul-id, usa nga kampanya han pagsusuma, usa nga kampanya han pankatilingban nga pag-imbestiga ngan pag-analisar ha klase (SICA), usa nga kampanya han pagsuson ngan pagsuson ha kalugaringon, usa nga kampanya han ebalwasyon ngan promosyon han mga kadre, ngan usa nga nagpapadayon nga kampanya agud seguruhon an pagpapatuman han tulo-kabalitang nga kurso ha edukasyon han Partido.

Kapareho han nagin pagduduon naton ha nakalabay, an kagiusan

pagtutul-id, ha prinsipal, usa nga kagiusan pag-aram, agud ig-isa an teoretiko nga kahibaruhan han mga kadre ngan kaapi ngan pahugton an pagsantop ha linya nga pan-ideolohiya, mga prinsipyo ngan palisiya han Partido. Ini an yawe agud maisa naton an aton rebolusyunaryo nga praktika. Kinahanglan upayon an pamaagi ngan estilo ha pagtrabaho agud mapadako an nakakabot nga target, mapahilarum ngan mahitul-id an panhunahuna ngan higwaos nga nagigin ulang o buko ha mas dako nga pag-abante. Magpapadayon an kagiusan pagtutul-id tubtub nga mapagdesisyon nga natudlok, nahisalikway ngan nauungbawan an mga nagin kaluyahan ngan pagsasayop ha nakalabay, ngan makabot naton an seguridad nga direksyon han paghiluag ngan pag-abante.

Mahugot gud an panginahanglan nga mailanat an pagsusuma ha ngatanan nga balitang ngan natad han buruhaton, labina ha naglabay nga 20-25 katuig tikang ha katapusan han ikaduka nga dakila nga kagiusan pagtutul-id. An pagsusuma hini nga panahon mahatag ha aton han mas hilarum nga pagsantop ha pankasaysayan nga balayan han mga nagin kaluyahan naton ha naglabay nga mga tuig. Responsabilidad han Komite Sentral nga pangunahan ini nga pagsusuma, kabakyang an tanan nga panrehiyon nga komite ha bug-os nga nasud.

Gin-aaro liwat ha tanan nga komite han Partido nga tagan hin prayoridad an pagbug-os han SICA nga nakapokus ha sistematiko nga pagtudlok ha pinakadagmit nga mga pankatilingban ngan pan-ekonomiya nga karukayaknon nga ginkakahitapo ha lupgop ngan balitang han ira pamumuno. Yawe an pagbug-os han SICA ha pagpaparayhak han mga pakigbisog han masa agud ipakigbisog an ira interes. Hini nga balayan kinahanglan bug-uson an plano agud butukon ngan pagiuson an hiluag nga masa.

Kinahanglan liwat ipatuman an mga ispesyal nga teoretiko nga pag-aram ha mga landaw nga isyu nga ginkakaatubang han katawhan. Atubangan han landaw nga isyu han korapsyon ilarum han rehimen

Marcos, kinahanglan mauyatom nga pag-adman han tanan nga kaapi han Partido an burukrata kapitalismo, ha giya han teoretiko nga artikulo nga igin-gawas han Komite Sentral. An mga artikulo ha Rebolusyon kinahanglan seryoso nga pag-adman han tanan nga kaapi han Partido.

Ha organisasyon, maisugon nga pahiluagon an Partido nga diri nakakapasakob bisan usa nga maraut nga elemento. Rekruton komo mga kandidato nga kaapi an pinakaabanteng nga mga elemento tikang ha mga panmasa nga aktibista nga diri mamenos ha 18 anyos an edad, andam nga karawton an Marxismo-Leninismo-Maoismo ngan an konstitusyon ngan programa han Partido, ngan naabuyon nga pursigido nga magpatuman han buruhaton ha diin man nga organisasyon han Partido ngan regular nga magbayad han butaw. Karawton hira komo mga hul-os nga kaapi kahuman han panahon han kandidatura nga igintatalaan ha konstitusyon.

Kinahanglan padayon nga konsolidahon ngan pakusgon an Partido subay ha demokratiko sentralismo, o demokrasya nga gin-gigiyahan han sentral nga pamumuno, ngan sentralismo nga nakabasar ha demokrasya. Igpadayon an mahugot nga pagpapatuman han mga desisyon han Komite Sentral ngan han mga namumuno nga komite han Partido agud dudrunan an pagmartsa tipaabante.

Pakusgon an sistema nga komite pinaagi han pagseseguro han regular ngan sistematiko nga pagmimiting han mga komite agud bug-uson an kolektibo nga pagdedesisyon ha mga ginkakaatubang nga karukayaknon, ngan agud kolektibo nga sugbungon an mga plano. Bug-uson an komite nga tagapagpatuman ngan sekretaryat han mga namumuno nga komite para ha matag-adlaw nga pamumuno ngan pagsubaybay ha mga buruhaton. Seguruhon nga mahugot nga nasusubaybayan han kolektibo an mga indibidwal ha pagpapatuman han mga buruhaton.

Padayon nga pakusgon an sistema han regular ngan ispesyal nga pagrereport ha hiruhitaas nga organo ngan an tukma nga paggiya ha

mga uruubos nga komite. Padayon nga pakusgon an magkalain-lain nga sistema ngan pamaagi han pasahay han komunikasyon.

Mahugot nga ipatuman an mga palisiya ha seguridad komo importante nga responsabilidad ha organisasyon. Mahugot nga ipatuman an mga palisiya ha paggamit han kompyuter, gadyet nga pankomunikasyon ngan higamit elektroniko, sistema han pag-encrypt ngan pagtitimos ha mga *computer files*, pagkokoda ha mga nota, ngan "pag-utod ha lastiko" ha mga *fixed point*, labina ha magpaso ngan namumuno nga kadre. Kinahanglan seguruhon han mga yunit han BHB an sikreto nga ginerilya nga paggios, paggamit han sikreto nga ruta, pagrekisa ha mga gamit nga iginsusulod ha yunit ngan pagtutdo ha sikreto nga kagiusan ha masa.

Tudlukon ngan pukaw nga pahiaran an ikaduha ngan ikatulo nga linya han namumuno nga kadre. Kinahanglan hira magpakaupay ha teorya ngan ha komprehensibo nga pagsantop ha mga prinsipyo ngan palisiya han Partido. Kinahanglan naton hira pahiaran komo mga propesyunal nga rebolusyunaryo nga hahangkupon komo ira bug-os nga kinabuhi nga karera an pagserbe ha Partido ngan rebolusyon. Maisugon hira nga tagan han bag-o nga mga buruhaton ngan responsabilidad, ngan ibutang ha mga bag-o nga buruhaton ha iba nga natad han buruhaton o lugar.

Ipatuman an palisiya han "simple nga panginabuhì, maduroto nga pakigbisog." Mahugot nga sumunod ha mga nakatalaan nga mga suklanan ha kagarastuhan han mga komite ngan indibidwal. Kinahanglan talinguhaon han ngatanan nga komite an sumarig ha kalugaringon. Magpalutaw han mga ginkikinahanglan nga rekurso para ha kalugaringon nga operasyon, ngan himuon an pinakamakakaya nga makag-amot ha sentral nga pondo han Partido.

Ha pulitika, kinahanglan naton pursigido nga pakusgon an Bagong Hukbong Bayan ngan parayhakon an rebolusyunaryo nga armado nga pakig-away, ipasulong an rebolusyunaryo nga kagiusan masa ha ka-

syudaran ngan kabaryuhan, pahilaparon an nasyunal nga nagkakaurusa nga prente, ngan parabungon an internasyunal nga buruhaton.

An Bagong Hukbong Bayan an prinsipal nga organisasyon nga aada ha mahugot nga pamumuno han Partido. Kinahanglan naton ini pursigido nga pakusgon agud ipasulong an rebolusyunaryo nga armado nga pakig-away komo prinsipal nga porma han pakigbisog ha pagpasulong han panmaihaan nga gerra han katawhan.

Aada ha maupay nga pusisyon yana an hukbo han katawhan agud pursigido nga magpakusog. Ini kahuman naton aydon an organisasyon ngan operasyon hini nga nakapokus prinsipal ha pagpapahilarum ngan pagpapahiluag han base panmasa, agud buligan an masa ha pagpasulong han ira mga kontrapyudal ngan kontrapasista nga pakigbisog, ngan pagpaparayhak han ira pagsuporta ngan partisipasyon ha armado nga pakig-away.

Pakusgon ngan pahiluagon an buruhaton masa han mga yunit han hukbo han katawhan ngan buligan an masa nga parayhakon ngan ig-isa an balitang han ira pag-ato. Kadungan hini, ig-isa an kapas han hukbo han katawhan ha paglalansar han ginerilya nga pakigerra. Pursigido nga ig-isa an karit han hukbo han katawhan ha paggamit han taktika han konsentrasyon, dispersal ngan pagbalhin agud pirme katinan an inisyatiba ha militar ngan pulitika. Igpabilin nga buta ngan bungol an kaaway ha presensya ngan gios han mga yunit gerilya. Atuhan ngan pakyason an mga operasyon kombatan, saywar ngan intelidyens han kaaway.

Kinahanglan igpabilin han mga yunit han BHB an hitaas nga pam-pulitika nga kapukawan, panmilitar nga disiplina ngan mapan-ato nga diwa han mga Pula nga mangaraway. Mahugot nga sundon an mga pagsurundon ha pagbabase, kalakat ngan buruhaton masa.

Pagiugon naton an mga iskward ngan platun han BHB agud isarang an armado nga pakig-away ha hiluag nga kabaryuhan, kabakyang an mga yunit milisya han katawhan ngan mga yunit pandepensa ha kalugaringon. Pwersahon an kaaway nga manipis nga unaton an iya ku-

sog, agud makahimo hin mas damo nga oportunidad para ha mga taktikal nga opensiba.

Iglansar an maaakos nga igdaug nga mga taktikal nga opensiba agud sirutan an mga lanong nga pasista nga kriminal, mga paramilitar nga elemento, ngan mga gin-gagamit nga elemento nga nagtraydor ha masa, ngan kumpiskahon an ira mga armas. Iglansar an ginkikinahanglan nga armado nga aksyon agud depensahan an interes ngan kaupayan han masa kontra ha mga nanlulupot han tuna, mga nadambong ngan naghihibang ha kalibungan ngan kriminal nga burukrata kapitalista nga nangangawat ha pondo han nasud.

Kinahanglan naton igdungan an pagpasulong han rebolusyunaryo nga armado nga pakig-away ha pagpapahiluag ngan pagpaparayhak han mga panmasa nga pakigbisog han parag-uma ha kabaryuhan. Pursigido nga ipasulong an mga kontrapyudal ngan kontrapasista nga pakigbisog, nga iginkakaw-it ha mga kontra-imperyalista nga pakigbisog. Kinahanglan pakusgon an kagiusan masa para ha reporma ha tuna, subay ha minimum ngan maksimum nga katuyuanan nga igintalaan han Rebolusyunaryo nga Giya para ha Reporma ha Tuna (RGRT) han Partido.

Kinahanglan ipasulong ha kabaryuhan an hiluagan nga pakigbisog agud pahimub-on an plete ha tuna, paraon an usura ngan ig-isa an suhol han mga trabahador ha uma. Kinahanglan abuton hini nga kampanya an pinakahiluag nga posible nga ihap han mga parag-uma. Poyde igpatuman an maksimum nga programa han distribusyon han tuna kun diin akos ini depensahan han armado nga kusog ngan kun diin kanya ini nga ig-administar.

Kadungan han pakigbisog para ha reporma ha tuna, kinahanglan ipasulong an mga pakigbisog para ha pagdepensa ha tuna kontra ha panlulupot han mga dagko nga langyaw nga kompaniya, kakunsabo an mga agaron maytuna ngan dagko nga kumprador burgesya, ngan kontra ha kumbersyon han tuna para ha pagpahiluag han mga minahan, plantasyon, mga proyekto nga

ekoturismo, *real estate*, "renewable energy," dam, ngan iba pa. Ini nga mga palisiya nagpapakuri ha masa nga parag-uma ngan naghihikaw ha ira han pakabuhian samtang ginhihibang liwat an agrikultural nga produksyon ngan kapas han nasud nga maghimo han sadang nga pagkaon para ha katawhan.

Kadungan hini, kinahanglan ipasulong an hiluag nga pakigbisog para ha makatadungan nga presyo han mga humay, sibuyas, lasuna, mga utanon ngan iba pa nga produkto ha uma, ngan pag-ato ha liberalisasyon ha importasyon han mga produkto nga pan-agrikultura. Kinahanglan bug-uson an hiluag nga katirig-uban han masa nga parag-uma ha magkalain-lain nga linya han pananum. Kinahanglan liwat padayon nga ibuksas ngan atuhan an buwa nga reporma ha tuna ngan iba pa nga programa han estado, nga nagpapadagmit ngan ginhihimo nga ligal an panlulupot han tuna, kalakip an SPLIT program han World Bank, ngan "new emancipation law" ni Marcos.

Ha rebolusyunaryo nga kagiusan masa ha kasyudaran, tagan naton hin prayoridad an dugang nga pagpapakusog han pag-oorganisa ngan pagpapagios ha ranggo han masa nga trabahador, ha бага-трабador ngan mga kabatan-unan nga estudyante. Pakusgon an pag-oorganisa ha ranggo han mga industriyal nga trabahador ha pinakadagko nga empresa ha nasyunal nga sentro nga syudad ngan iba pa nga dagko nga syudad ha magkalain-lain nga parte han nasud. Kadungan hini, pakusgon an pag-oorganisa ha mga trabahador ngan бага-proletaryado ha mga kabras nga komunidad ha kasyudaran. Dugang nga pakusgon an pag-oorganisa ha mga kabatan-unan nga estudyante ha mga mayor nga syudad ha bugos nga nasud.

Kinahanglan pakusgon an mga sektoral nga pakigbisog, pan-ekonomiya ngan mga lokal nga pakigbisog, kadungan an mga pakigbisog nga kontra-imperyalista, kontra-burukrata kapitalista ngan kontrapasista, ngan pagsuporta ha mga pakigbisog han parag-uma ha kabaryuhan. Kinahanglan talinguhaon nga utro nga pabyulhon ha pagsu-

lod han bag-o nga tuig an kagiusan protesta kontra ha korapsyon agud papagbatunon hi Marcos ngan Duterte komo hadi ngan reyna han korapsyon, ngan ipanawagan an pagpapabul-iw ha ira o pagpapatalsik.

Ibuksas an pagsuporta han imperyalismo nga US ha korap nga rehimen Marcos. Kadungan hini, iganak an hiluag nga kampanya nga propaganda kontra ha tikadako nga presensya han mga tropa nga Amerikano ha Pilipinas, pag-iistak han mga higamit pan-gerra, pagtitindog han dugang nga mga base ngan panmilitar nga pasilidad, waray tubtuban nga mga pagpapahira ha gerra, ngan an dara hini nga natikadako nga hulga nga lumarab an gerra nga magdadanang ha nasud. Ibuksas an papel han US ngan mga lunod-patay nga maka-US nga grupo nga gin-gagamit hini ha pagsulsol han mga sumpakiy ha South China Sea.

Padayon nga pakusgon an mga sikreto nga rebolusyunaryo nga organisasyon masa, pakusgon an propaganda ngan panawagan para ha demokratiko nga rebolusyon han katawhan, ha butnga han pagpasulong han hiluag nga dayag nga kagiusan masa. Aghaton an pinakadamong nga sumuporta o magpartisipar ha armado nga pakig-away ngan pakigbisog han masa ha kabaryuhan.

Ha pamumuno han klase nga trabahador pinaagi han Partido, kinahanglan padayon nga pakusgon an nasyunal nga nagkakaurusa nga prente agud pahiluagon an suporta para ha nasyunal ngan demokratiko nga pakigbisog han katawhan. Kinahanglan naton bug-uson an hiluag nga katawhan kontra ha imperyalismo, pyudalismo ngan burukrata kapitalismo. Kinahanglan ini tukuron ha madig-on nga pundasyon han batakan nga rebolusyunaryo nga alyansa han klase nga trabahador ngan klase nga parag-uma, prinsipal ha kongkreto nga porma han Bagong Hukbong Bayan, usa nga hukbo nga parag-uma nga aada ha ilarum han absoluto nga pamumuno han klase nga trabahador, ngan iba pa nga porma han alyansa o pag-uurusa han kagiusan trabahador tikang ha kasyudaran ha kagiusan parag-uma ha kabaryuhan.

Ha pundasyon han batakan nga

rebolusyunaryo nga alyansa mabubug-os an progresibo nga alyansa han masa nga anakbalhas ngan han petiburgesya ha syudad, ngan an mas hilapad nga patriyotiko nga alyansa han mga progresibo nga pwersa ngan nasyunal nga burgesy. Mabubug-os liwat han Partido an mga temporaryo nga alyansa ha mga diri madig-on ngan diri masasarigan nga alyado, kaagsuban ha usa o pira nga parte han naghahadi nga klase kontra ha pinakareaksyunaryo, pinakapasista ngan pinakasunud-sunuran ha imperyalista nga US.

Yawe ha pagbubug-os han nasyunal nagkakaurusa nga prente an pagkakamayda hin makusog nga batakan nga rebolusyunaryo nga alyansa. Kinahanglan pukaw nga mag-ikmat ha Tuo nga oportunista nga tendensiya nga madanas o mahulog ha repormismo o ligalismo; o ha "Wala" nga oportunista nga tendensiya nga magserra han purtahan ha diri malalauman ngan diri madig-on nga pwersa nga makakag-amot ha pagpapasulong han nasyunal-demokratiko nga kagiusan, ha direkta o diri direkta nga pamaagi.

Ha pankadagmitan nga tidaron, kinahanglan talinguhaon nga bug-uson an pinakahilapad nga nagkakaurusa nga prente kontra kan Marcos ngan Duterte, nga yana pareho nagtataglawas ha pinakareaksyunaryo ngan pinakapasista nga paksyon han naghahadi nga klase, agud bug-os kusog nga ihimulag, atuhan ngan patalsikon an naghahadi nga rehimen.

Ha basaranan han kusog han paggios han masa nga anakbalhas ngan petiburgesya ha syudad ha pag-ato ha rehimen US-Marcos, kinahanglan aghaton an mga maaalyado nga pwersa, labina na ha mga pankultura nga institusyon sugad han singbahan ngan eskoylahan, ngan mga aada ha sibil nga serbisyo, nga aktibo nga ibuksas ngan suknaon an korapsyon ngan dunot nga sistema. Kinahanglan kabigon hira nga gumapil ha rebolusyunaryo nga nagkakaurusa nga prente.

Kinahanglan ibuksas ngan suknaon an mga ahente han imperyalismo nga US ngan ikog han naghahadi nga klase sugad han Akbayan ha pangunguwat ha masa ngan pagsisi-

mang han ira pakigbisog.

Kinahanglan dirudiretso nga pakusgon han Partido an rebolusyunaryo nga buruhaton ha langyaw nga labnasan, ha pag-oorganisa han mga migrante nga Pilipino nga trabahador, pagbubug-os han internasyunal nga nagkakaurusa nga prente nga kontra-imperyalista ngan pagpapakusog han pankalibutan nga proletaryo nga magbinurugto.

Kinahanglan mahugot nga butukon an mga migrante nga Pilipino ha mga nasud kun diin hira gin-eempleyo agud atuhan an magkalain-lain nga porma han pananalumpigos ngan diskriminasyon han ira mga langyaw nga amo, sugad liwat an mga pakuri nga palisiya ngan pangigipit han reaksyunaryo nga gubyrerno ha Pilipinas. Kinahanglan hira pukawon agud isumpay an ira mga pag-ato ha nasyunal-demokratiko nga pakigbisog ha nasud, ngan aghaton hira nga umuli ngan magpartisipar ha rebolusyunaryo nga kagiusan.

Bug-uson an pinakahiluag nga pukot han pakikigsangkay ha tanan nga katawhan ha tanan nga parte han kalibutan agud suportahan ha ngatanan nga pamaagi an rebolusyunaryo nga pakigbisog han katawhan Pilipino. Bug-uson ha ira rang-

go an pinakadamo nga grupo nga nasuporta ngan asosasyon nga nakikigsangkay, ngan aghaton hira nga umamot ha nasyunal ngan demokratiko nga mga pakigbisog han katawhan Pilipino.

Responsabilidad han Partido nga mag-amot ha dirudiretso nga pagpapakusog han pankalibutan nga kontra-imperyalista nga nagkakaurusa nga prente. Kinahanglan iduso han Partido an pagbubug-os o pagpapakusog han internasyunal nga kontra-imperyalista nga alyansa ngan mga kampanya kontra ha imperyalismo nga US, nga yana amo an numero uno nga imperyalista nga nanunulsol ngan nagduduso han mga armado nga sumpakiay ha magkalain-lain nga parte han kalibutan.

Kaanggayon nga padayon nga pakusgon han Partido an pakikigmagbinurugto ha magkalain-lain nga mga pwersa nga proletaryo ha magkalain-lain nga nasud, agud ig-undong ngan igpasamwak an Marxismo-Leninismo-Maoismo ngan gamiton ini ha praktikal nga aplikasyon ha magkalain-lain nga nasud. Samtang waray pa basaranan para tukuron an usa nga internasyunal nga sentro, ginsusuportahan han Partido an mga teoretikal nga diskusyon, da-

yologo, ngan praktikal nga bubligay han mga partido ngan pwersa nga komunista ha katuyuanan nga aghaton an pagbubug-os ngan pagpapakusog han partido komunista komotaliba han mga bag-o nga demokratiko o sosyalista nga rebolusyon ha magkalain-lain nga nasud.

Nagpapabilin nga pinakadako nga amot han Partido ha pankalibutan nga kagiusan komunista an pagpapasulong han nasyunal demokratiko nga rebolusyon han katawhan ha Pilipinas. Kada pitad tipaabante ngan kadaugan nga nakab-ot han Partido ha pagpasulong han rebolusyon Pilipino suntok ha imperyalismo nga US, nga amot ngan inspirasyon ha ngatanan nga proletaryo nga pwersa ha ngatanan nga parte han kalibutan.

Sugad na la an determinasyon han Partido Komunista ng Pilipinas, kabakyang an ngatanan nga rebolusyunaryo nga pwersa ha Pilipinas, nga bug-os kusog nga ipasulong an demokratiko nga rebolusyon han katawhan. Atubangan han paborable kaupay nga sitwasyon, ngan ha tukma nga pamumuno han Partido, nalalantaw han Komite Sentral nga magmamartsa tipaabante an panmaihaan nga gerra han katawhan ngadto ha hul-os nga kadaugan.

**Pankatinnan ngan igsapraktika an Marxismo-Leninismo-Maoismo!
Tapuson an imperyalismo, pyudalismo ngan burukrata kapitalismo!
Igpalaypakay an Pula nga bandera han demokratiko nga rebolusyon han katawhan!
Ipasulong an panmaihaan nga gerra han katawhan!
Mabuhay an proletaryo ngan katawhan Pilipino!
Mabuhay an Partido Komunista ng Pilipinas!**